

1 KOLIN

Pol Mij Ned Ak Kolin Binib Kilop Tikak

¹ Yad Pol. God niñid yip aglek, bi Klays Jisas takaw nop dad ameb ak midebin. Miñil mam chin Sostenes ayip midil,

² chil mij anib ak ñu kil tikobul. Tikil, nibi God binib ne taun Kolin pelpel apnan gipim ak nibop ñobun. God ne ke nibop binib suntep yad yelañ agil dinig nim, Klays Jisas nop agyokek apil gek, binib suntep ne midebim. Nibop ayip, binib man okok midupsek kili Biawl chin Jisas Klays nop agniñid yib nop dad aplanabal okok ayip, nibop binib yad aglak. Jisas Klays, ne Biawl kili ak midil, Biawl chin ak abe mideb.

³ Bapi God chin ayip Biawl Jisas Klays ayip, bi apilmiñal anib ak nibop yimug niñid gitep gel midtep ginimib.

Pol God nop tep agup

⁴ Pen God ne nibop gek, Klays Jisas chigil midem nibop yimug niñid gitep gup. Anib ak niñid, yad God nop pel tep apin.

⁵⁻⁶ Nibop Klays takaw nop ak agñilig agonok nepek tek gup. Anib ak nibi Klays nop chigil midem, God ne nibop ditep yibil gup. Gek, takaw ne midupsek agñi tep gil, gos ne midupsek nigtep gipim. Anib ak niñid, yad God nop pel tep apin.

⁷ Anib ak tek nibi Biawl chin Jisas Klays tep adikid misen ownigab agil kod midebim nin awl, God Kawnan ne ak nibop ditep yibil gaknin, tap ne olap ma tek dup.

⁸ Jisas ne nibop kiles ne ak nek kiles yibil yenigabim. Kiles midil, mid dad amil, nin kidek ak ownigab ak nim, Biawl chin Jisas Klays nin awl ne ak apek takaw oginap ma dinigabim.

⁹ God ne nibop suk agil, nine Biawl chin Jisas Klays ayip di jimnil lak. Pen chin nopun, God agak tek midupsek ginigab.

Kolin binib Klays yil yelak okok, kili asik keke midebal

¹⁰ Mam ay sikop, kiles gil agnunid agebin. Biawl chin Jisas Klays yil midebim ak, nibi midupsek takaw nokom olap gos ninid aginimib. Takaw oginap agil asik keke ma linimib. Jimnil midil, gos nokom ninid chin ayip tap nokom ginigun agil gos niginimib.

¹¹ Mam ay yad okok, bin Klowes binib ne okok apil yip ninid anib apal, Penpen agil midebim apal.

¹² Pen yad agebin ak, anib agebin. Nibi oginap apim, Pol bine midebin apim. Pen oginap apim, Apolos bine midebin apim. Pen oginap apim, Pita bine midebin apim. Pen oginap apim, Klays bine midebin apim.

¹³ Titay dup? Apim anib ak Klays nop tig asik keke lipim tek lup. Yad Pol mab bak alaj chipil pak

1:7 Luk 17.30, Plp 3.20, 2 Te 1.7, Tat 2.13, 2 Pi 3.12 **1:8** Plp 1.6, Kol 1.22, 1 Te 3.13, 5.23 **1:9** Ais 49.7, Jon 17.21, 1 Ko 10.13, 1 Te 5.24, 1 Jo 1.3 **1:10** Lom 12.16, 2 Ko 13.11, Plp 2.2, 3.16, 1 Pi 3.8
1:12 Jon 1.42, Apo 18.24-28, 19.1, 1 Ko 3.4

tibik lel nibop nen agil kumnek akan, yib yip Pol agil ñig pakñibek? Mel yibil.

¹⁴ Pen am nib ayip yenek ñin ak, Klispus ayip, Gayus ayip kilop nep ñig pakñinek. Nibop olap ma ñig pakñinek. Anib ak God nop tep apin.

¹⁵ Nibop ma ñig pakñinek anib ak tek, yokip ak nibi olap Pol yib nop agil ñig pakinok apikep tek lup.

¹⁶ Pen sawl gipin. Stepanas binib ne okok kilop abe ñig pakñinek. Binib oginap sek ñig pakñinek akan, yad ma nepin.

¹⁷ Niñid apin. Klays yip agyokil, binib okok kilop ñig pakñinimin agil ma agak. Agyokil, kilop takaw telep ak agñinimin agak. Pen agñilig, bi oginap chin nep gos tipagil nopun agil apal tek ma apin. Takaw anib ak anigil agen, Klays mab bak alar kumak takaw ak, takaw yokip olap tek lek, binib okok ma dipilap tek lup.

Klays ne God kiles ak sek mideb, ne God gos nigtep gup ak sek mideb

¹⁸ Niñid apun, binib mab ke yineb amnig gi midebal okok, kili Klays mab bak alar kumak takaw ak niñid, sawl takaw agebal agil keligipal. Pen chinop binib God tig asik di mideb okok, chin takaw anib ak niñid, ne ke yibil niñid gup agil nopun.

¹⁹ Adek anib ak buk Baybol ak tikil agak, Binib gos tipagil nopun apal okok, gos kilop gen kul

1:14 Apo 18.8, 19.29, Lom 16.23 **1:16** 1 Ko 16.15 **1:17** Mat 28.19, Jon 4.2, 1 Ko 2.1, 2.4, 2.13, 2 Pi 1.16 **1:18** Apo 17.18, Lom 1.16, 1 Ko 2.14, 15.2, 2 Ko 4.3 **1:19** Ais 29.14, Jer 8.9

ginigab agil tikak. Binib gos nigep midebal okok, gos kili ak keligil ma dinigayn agil tikak.

²⁰ Anib ak bi gos nigep okok ninid, tay agobun? Bi kili Mosis takaw nu kil tikak ak nigtep gep okok ninid, tay agobun? Bi lum awl takaw titay ag amil apil gipal okok ninid, tay agobun? Gos teplep kili nepal ak lum awl, God ne ninid gek, sawl takaw tek lek, pisnep apyap pakup.

²¹ God ne ke gos nigtep gup tek, ne nigup, binib lum awl gos chin ke okok niginigun agil ke nep piyow nepal okok, ne bi tay tek agil ma niginigel tek lup. Anib ak tek ne ke ginig nig lak tek, binib kili takaw ne agnibun ak ninid, anib apal, Takaw sawl sek apal. Pen takaw anib ak agnon, binib okok kili ninid nop gos linigel, kilop tik asik dup.

²² Juda binib okok kili tap mageptek niginigun agil gos nepal, binib Juda mel okok kili gos teplep adek ak niginigun agil pel piyow nepal.

²³ Chin pen Klays mab bak alan chipil pak tibik lel kumak takaw ak agnibun. Agnon, Juda binib okok ninid, takaw yilik gup ak chin ninid apyap pakinigun agil gos nepal. Pen binib Juda mel okok ninid, takaw sawl ak ma niginigun agil gos nepal.

²⁴ Binib pen God kilop suk agil dak okok, Juda binib ayip binib Juda mel ayip, kili ninid anigil nepal, Klays ne God kiles ak sek mideb, ne God gos nigtep gup ak sek mideb.

²⁵ Binib lum awl midebal okok, kili anigil gos

1:20 Jop 12.17, Ais 19.12, 33.18, 44.25, Mat 11.25, Luk 10.21, Lom 1.20-21, 1.28 **1:21** Mat 11.25, Luk 10.21, Lom 1.20-21, 1.28 **1:22** Mat 12.38, Mak 8.11, Jon 4.48, Apo 17.18, 17.32 **1:23** Ais 8.14, Mat 11.6, Jon 6.60, 6.66, Lom 9.32, 1 Ko 2.14, Gal 5.11 **1:24** Lom 1.4, 1.16, 1 Ko 1.18, Kol 2.3 **1:25** 2 Ko 13.4

nepal, God gos ne oginap sawl sek mideb. Pen gos ne ak midupsek awl yibil teplep yibil mideb, binib gos nigep kili ak sikol yibil gup. Pen kili abe gos nepal, God titay gup okok, oginap ninid chin nopun, God kiles ma mideb. Pen kiles ne ak midupsek awl yibil mideb, binib kiles kili ak sikol yibil gup.

²⁶ Mam ay sikop, ned God nibop suk agil dak nin ak, gos nigtep ginimib. Nin anib ak, nibi kunay yibil, binib gos lum awl nigtep yibil gipal okok ma yeligipim. Nibi kunay yibil binib kiles midil yib yek okok ma yeligipim. Nibi kunay yibil nonim nap yib awl yoligup okok ma yeligipim.

²⁷ God pen anigil gos nigak, binib gos lum awl nigtep yibil gipal okok kilop gek neben dinigel. Anib ak tek binib sawl sek apal okok kilop aglil dak. Pen anigil gos nigak, binib kiles midil lum awl yib yek midebal okok kilop gek neben dinigel. Anib ak tek binib kiles ma mideb apal okok kilop aglil dak.

²⁸ Pen anigil gos nigak, binib awl yib yek midebal okok, kilop gek yokip yibil yenigel. Anib ak tek binib lum awl tam okok yib ma mideb apal okok kilop aglil dak.

²⁹ Anigup ak nim, binib olap God widin midup adek ak, yib ke dad aplanigel tek ma lup.

³⁰ God ne ke nibop gek, Klays Jisas ayip chigil midebim. Pen Klays nop gek, ne gos nigtep gep chin ak jij mideb. God Klays nop agek chinop gek, agak tek kidek gil binib suntep ne midil, chinop

1:26 Mat 11.25, Jon 7.48, Jem 2.1-5 **1:27** Mat 11.25, Jem 2.5

1:29 Lom 3.27, Epe 2.9 **1:30** Jer 23.5-6, Jon 17.19, 2 Ko 5.21

pisnep dek kim amobun.

³¹ Takaw adek anib ak, buk Baybol ak tikil agak, Binib miñmiñ ginigun agil, God gup tek niñid, miñmiñ gil God yib nop dad aplanigel agil tikak.

2

Pol gos ne ke ma dil, God Kawnan gos nop ak dil agñub

¹ Pen mam ay sikop. Am nib ayip yenek ñin ak, God takaw ne we gil yoligup ak agñin agil, takaw teplep okok bi gos nigep apal tek ma aginek.

² Yad anigil gos niginek, nib ayip midil, tap olap ke gos ma nigin. Jisas Klays, ne mab bak alan kumak nokom nim gos nigin agil niginek.

³ Pen nib ayip yenek ñin anib ak, kiles ma midil, jepjep dilig pilikil yenek.

⁴ Binib oginap gos tep kili ke piyow niñid, takaw yidek adip adip adek anib ak nep agun agil gipal tek ma ginek. God Kawnan ne ak wog kiles gil, yip gos ñakniñ takaw ne agñinek ak nim, misen tek lak.

⁵ Anigek, God kiles ne ak nibop gakniñ, Klays nop gos liniginimib tek lup. Nibi pen binib gos nigep adek ak nigilig, Klays nop gos liniginimib tek ma lup.

God Kawnan ne nokom chinop gos teplep ñub

⁶ Pen chin binib God nop chig tep gipal okok niñid, kilop gos teplep yibil ak agñibun. Pen gos teplep anib ak, lum awl gos tep ak mel. Biawl lum

1:31 Jer 9.23-24, 2 Ko 10.17 **2:1** 1 Ko 1.17 **2:2** Gal 6.14, Plp 3.8
2:3 Apo 18.9, 2 Ko 10.1 **2:4** Lom 15.19, 1 Ko 1.17, 1 Te 1.5, 2 Pi 1.16 **2:5** 2 Ko 4.7, 6.7 **2:6** 1 Ko 1.28, Epe 4.13, Plp 3.15, Hib 5.14

awl midebal okok, gos tep kili ak abe mel. Kili apyap pakinigebal.

⁷ Gos teplep yibil chin agñibun ak, God gos ne ak we gil yoligup. Bilel bilel God man ma alwol gilak ñin ak, gos ne ke niñid chinop aglak. Aglil agak, Kili yad ayip midil, midtep ginigel agak. Pen bilel nib mid dad apil, gos teplep yibil anib ak we gil yek, chin midupsek ma nigoligipun.

⁸ Biawl miñil ñin awl midebal okok midupsek, gos anib ak ma yibil nepal. Nepilap tek, Biawl yib awl mideb ak nop mab bak alan chipil ma pak tibik lipilap.

⁹ Chin pen anigil agobun ak, takaw anib ak buk Baybol migan ayan mideb. Anigil tikil agak, Tap okok binib widin ma yibil nigilak ak, timud ma yibil nigilak ak, gos ma yibil nigilak ak, tap teplep anib okok God ne dilitep gil, binib God nop mapen lipal okok kilop ñinigab agil tikak.

¹⁰ Tap anib okok takaw ak we gil yoligup ak pen, God ne Kawnan ne ak agyokek apil, tap anib okok misen linimun agil, chinop gos ñek nopun. God Kawnan ne ak tap okok midupsek piyow niñid, God gos ne we gil mideb ak nigtep gup.

¹¹ Bi olap gos titay nigup ak, binib okok gos anib ak ma nepal. Mel. Bi anib ak, bipil nab ne ayan mideb ak nep gos anib ak nigup. Anib ak nep tek, God gos titay nigup ak, binib okok gos anib ak ma nepal. God Kawnan ne ak nep gos anib ak nigup.

¹² Chin pen kawnan lum awl nib olap ma dipun.

2:7 Lom 16.25-26, Epe 3.5, 3.9, Kol 1.26, 2 Ti 1.9 **2:8** Luk 23.34,
Jon 7.48, Apo 13.27, 2 Ko 3.14 **2:9** Ais 64.4 **2:10** Mat 13.11,
16.17, Jon 14.26, 1 Jo 2.27 **2:11** Snd 20.27, Jer 17.9, Lom 11.33-34
2:12 Jon 16.13-14

God ne Kawnan ne ak agyokek dipun ak nim, tap teplep yibil chinop monmon ñub ak nigtep gipun.

¹³ Chin tap teplep yibil anib okok gos niñid agobun ak pen, bi gos tipagil nepal okok agñel niñid ma agobun. God Kawnan ne ak chinop gos ñek takaw anib ak agobun. God Kawnan ne ak takaw agup ak niñid dil, binib God Kawnan ne sek midebal okok kilop agñobun.

¹⁴ Pen binib God Kawnan ne sek ma midebal okok, God Kawnan tap teplep ne ak ma dipal. Tap teplep anib ak tap yokip agil gos niñid, nigtep ginigel tek ma lup. Binib pen God Kawnan ne sek midebal okok, kilop gos ñakniñ, tap teplep anib okok tig asik lil nigtep ginigel tek lup.

¹⁵ Binib olap God Kawnan ne sek mideb ak, tap okok midupsek tig asik lil nigtep gup. Binib yokip okok pen binib anib ak nop niñid, ne anigup ak tig asik lil nigtep ginigel tek ma lup.

¹⁶ Buk Baybol ak tikil anib agak, Binib an tek Biawl gos timud ne ak anigil mideb aginigab agil tikak? Binib an tek nop gos timud wukinigab agil tikak? Bi anib ak tek olap ma mideb. Chin pen, Klays gos ne ke dil nigtep gipun.

3

Chin bi God wog giñeb ne midobun okok

¹ Mam ay sikop. Yad nibop takaw agñinek ak, binib God Kawnan ne sek midebal okok kilop agñinek tek nibop ma agñinim tek lak. Mel. Binib

2:13 1 Ko 1.17, 2.4, 2 Pi 1.16 **2:14** Mat 16.23, Jon 8.47, 14.17, Lom 8.5-7, 1 Ko 1.18, 1.23 **2:15** 1 Te 5.21, 1 Jo 2.20, 4.1 **2:16** Jop 15.8, Ais 40.13, Jer 23.18, Jon 15.15, Lom 11.34 **3:1** Jon 16.12, 1 Ko 2.14-15

tap lum awl yil gos nigilak okok akan, binib ñapay ñañ Klays nop gos nigilak tek okok, kilop agñinek tek nibop agñinek.

2-3 Ñapay ñañ tul ññeb tek ak midebek, binib awl tap ñibal tek ma midebek. Anib ak bin kili ñapay ñañ tul ñibal tek nibop agñinek. Nibop God takaw oginap agñinek, oginap agñen ma niginimib tek lak ak ma agñinek. Midobun ñin awl abe, tap lum awl yil gos nigilig yibil midebim tek, God takaw oginap agñen niginimib tek ma lup. Anib apin, nibi mam ay okok kilop nigem chibol nibop ak timel gil, milik yapek penpen agil midebim. Pel anigipim ak yad nepin, tap lum awl yil gos nigilig yibil midil, binib lum awl okok gipal tek gipim.

4 Bi nibi olap agup, Yad Pol bine midebin agup. Pen bi nibi olap agup, Yad Apolos bine midebin agup. Nibi anib apim ak yad nepin, nibi binib lum awl okok gipal tek gipim.

5 Pen nigtep ginimib. Apolos ne bi an? Yad Pol, yad bi an? Chil bi ominal bi wog giñeb midobul. Biawl ne chilop aglek, wog keke aglak tek gipul. Pen wog nop ak giñol niñid, nop gos linepim.

6 Yad tap yin yimnek tek ginek, Apolos ne ñig mal dap tap yimnek anib ak sogak tek gak. God pen ne nokom gek tap jakup.

7 Anib ak bi tap yin yimub ayip, bi ñig sogup ayip, ominal gil bi yokip yib awl ma midebil. God gek tap jakup ak pen, ne ke nokom yib awl mideb.

8 Binib tap yin yibal okok binib ñig sopal okok,

3:2-3 Jon 16.12, 1 Ko 1.10-11, 11.18, Gal 5.20-21, Hib 5.12-14, Jem 3.16, 1 Pi 2.2 3:4 1 Ko 1.12 3:6 Apo 18.4-11, 18.24-28, 19.1, 1 Ko 1.30, 2 Ko 3.5, 10.14-15 3:7 2 Ko 12.11, Gal 6.3 3:8 Lom 2.6, Gal 6.4-5, Lep 22.12

wog nokom yibil gipal. Pen nokom nokom wog gipal tek niñid, kilop nokom nokom tap tep pen ñinigab.

⁹ Chilmiñal God wog ak jimñil gilig midobul. Nibi God wog day ne tek midebim. Pen abe God kal ne tek midebim.

¹⁰ God ne yip yimug niñid gitep gek, bi kal gep gos telep yibil mideb tek midebin. Anigil midil, kal meg awl nab ayañ ak puñilen, bi olap apil dayday mideb okok kidek geb. Pen binib apil kal anib ak ginig, kili keke nigtep gil ginigel.

¹¹ Nib nepim, God ne Jisas Klays nop dil, kal meg awl nab ayañ pisnep puñilak. Nop pisnep puñilek, binib olap tigju yokil, kideyil olap puñilini muñ tek ma lup.

¹² Pen kal dayday yek gebal ak, binib oginap tap gol dil gebal ayañ, oginap silpa dil gebal ayañ, oginap kab telep yibil dil gebal ayañ, oginap mab dil gebal ayañ, oginap bopil dil gebal ayañ, oginap sid dil gebal.

¹³ Pen kidek God kot awl gep ñin ak, binib midupsek wog titay gipal ak misen linigab. Ñin anib ak apil sup ñek wog gebal anib okok midupsek yinek, keke bilok niginigel, tep mideb ayañ mel.

¹⁴ Binib an kal day wog gek, ma yinil midtep yenigab, God nop tap telep pen ñinigab.

¹⁵ Pen binib an kal day wog gek, pisnep yin pag yowenigab, God nop tap telep pen ma ñinigab. Bi

3:9 Mat 13.3-9, Apo 15.4, 2 Ko 6.1, Epe 2.20-22, Hib 3.3-4, 1 Pi 2.5

3:10 Lom 15.20, 1 Ko 4.15, 15.10, 1 Pi 4.11, 2 Pi 3.15, Lep 21.14

3:11 Ais 28.16, Mat 16.18, 2 Ko 11.4, Gal 1.7, 1 Pi 2.4-6 **3:13** Luk

2.35, 1 Ko 4.5, 2 Te 1.7-10, 1 Pi 1.7, 4.12

anib ak, nop timel gek kul ma ginigab ak pen, ne mab yineb nab ayan yek adikiid dipal tek yinigab.

Nibi God kal ne ak midebim

16 Nibi God kal ne ak midebim, Kawnan ne ak nibop migan ayan mideb. Tap anib ak ma nepim akan?

17 God kal ne ak, ne aglek kal suntep ne ke mideb. Pen nibi kal ne anib ak midebim. Anib ak bi an God kal ne ak gi timel genigab, nop pen abe gi timel ginigab.

Chin ke binib gos nigep midobun agil ma aginimib

18 Nibi ke takaw yepis aginimib tek lup anib ak, nigtep ginimib. Bi nibi olap, ne gos tep lum awl ak nijid, bi gos nigep midebin agil gos nigup nim, ne ned bi sawl sek tek yonimun. Anigenigab, kidek ne bi gos nigep ak yenigab.

19 Chin nopun, binib lum awl gos teplep tek agil nepal okok, God nigek binib gos sawl sek lipal. Buk Baybol ak tikil anib agak, Bi oginap chin bi gos nigep midobun ak, gos chin ak ke nijid binib kilop yepis aginigabun agil gos nepal agil tikak. Anigil gos nepal ak pen, God ne gos kilop gek, gon tek kilop dinigab agil tikak.

20 Pen takaw olap sek tikil agak, Bi gos nigep okok, Biawl ak ne gos kili ak nigup agil tikak. Pen anigil nigup, gos kili ginigun agil gos nepal ak, jii olap ma mideb yokip yibil yenigab agil tikak.

²¹ Anib ak nibi binib oginap kilop, binib awl midebal agil yib kilop dad ma aplanimib. Yad nepin, tap okok midupsek tap nibi.

²² Pol akan, Apolos akan, Pita akan, lum awl akan, pel midep akan, kumeb akan, tap okok miñil mideb akan, kidek yenigab ak, tap okok midupsek tap nibi.

²³ Pen nibi Klays binib ne midebim, Klays ne God bine mideb.

4

God ne ke bi wog giñeb ne okok wog kili bilokil nigup

¹ Anib ak binib kili chinop niñid, anigil gos niginigel, chin Klays bi wog giñeb ne ak midil, God takaw ne we gil yoligup ak kod midil agñibun.

² Pen bi wog giñeb okok, monmon ginigel tek ma mideb, biawl kili ak agilak tek nep ginigel.

³ Anib ak tek nib akan, bi oginap nibi yip tig asik lil aginigabim, Ne monmon gup aginigabim ak, yokip aginigabim. Yad abe, tap yad gipin ak niñid tig asik ma lipin.

⁴ Niñid apin, yad ke tap timel ma gipin agil gos nepin ak pen, yad bi tep midil tap timel ma gipin apin ak ma aginim. Mel. Biawl ne ke yip tig asik lil, takaw anib ak agup.

⁵ Anib ak miñil yip takaw anib ak tek ma aginimib. Kidek Biawl ne ke apil, ñin anib ak takaw anib ak tek aginigab. Ne tap we gel kisilim

3:21 1 Ko 1.12, 3.4-6, 2 Ko 4.5, 4.15 **3:23** Lom 14.8, 1 Ko 11.3, 2 Ko 10.7, Gal 3.29 **4:1** Luk 12.42, 1 Ko 3.5, 2 Ko 6.4, Tat 1.7, 1 Pi 4.10

4:2 Luk 12.42 **4:4** Jop 9.2, Sng 143.2, Snd 21.2, Lom 4.2 **4:5** Lom 2.1, 2.29, 1 Ko 3.8, 2 Ko 5.10, Lep 20.12

nab mideb okok dil, milek nab okok linigab. Pen binib okok midupsek gos kili nab ayan abe ninid misen aginigab. Nin anib ak, God binib midupsek ninokom gipal gipal tek, kilop takaw tep aginigab.

Kolin binib yib kili ke dad aplanibal

⁶ Pen mam ay okok. Takaw apin anib ak, Apolos chilminjal apin ak, nibi gos nigtep ginimib agil, nibop agnitem gebin. Nibi ke gos tipagil nopun agil ke tep gakniñ, bi nibop oginap yib kilop dad aplanigabim, bi nibop oginap kilop keliginigabim ak, anigil ma yibil ginimib apin. Pen buk Baybol tikil agilak tek ginimib, gos ke nepim tek ma ginimib apin.

⁷ Titay dil? An nibop aglek biawl okok midebim? Nibi tap teplep olap dipim ak pen, God yil ma dipim akan? Ninid yibil apin, God nokom tap anib okok nibop ñek di midebim. Ne nokom ñub, anib ak taynen yib nibi ke dad aplanil apim, Chin binib nigtep gil, gitem yibil gil tap anib okok dipun apim?

⁸ Nibi tap teplep okok kunay yibil mideb akan? Nibi tap okok midupsek dil, midtep yibil gipim akan? Nibi binonim midtep gipal tek midebim pen chin yokip midobun akan? Pen nibi binonim yebilap, chin abe binonim nibi ayip yobinop, yip tep yibil gup. Ak pen mel.

⁹ Yad anigil gos nepin, chin bi Jisas takaw nop dad ameb okok, God chinop di kidek okdan lup. Chinop aglil, pak linig nag lipal tek midobun. Anigek, binib okok ayip ensel okok ayip, lum awl

4:6 Lom 12.3, 1 Ko 1.12, 3.4, 3.21
1.17, 1 Pi 4.10 4:8 Lep 3.17, 3.21

4:7 Jon 3.27, Lom 12.6, Jem
4:9 Lom 8.36, 1 Ko 15.30-31,

2 Ko 6.9, Hib 10.33

midebal okok midupsek, chinop niñid, bi yokip tek lek paklel midebal tek agil gos nepal.

¹⁰ Chin Klays yil midil wog tapin gon, chinop nigel bi sawl tek lup. Nibi pen Klays yil midil binib gos nigep ne okok tek midebim. Chin bi kiles ma midobun ak pen, nibi binib kiles timel midebim. Chin bi yib sek mel ak pen, nibi binib yib awl sek midebim.

¹¹ Bilal tikil mid dad apil, miñil midobun ñin awl, chin yuwan gil, kuñam milep gil, chech ma midil, chinop pakil pakel koslam yibil midil, kal kineb ma midil aj nep midobun.

¹² Pen ke nep tiñil yipil gil wog gipun. Chinop agjupal ak, kilop pen God kod miden agil, nop agnopun. Chinop gi timel gipal ak, gos anib ak ma niñid miñel dipun.

¹³ Chinop takaw timel apal ak, kilop pen takaw sayn apun. Chin silkul tap dayday tek midon mid dad apil ñin awl apek, binib okok chinop nigel, silkul tap dayday gach sek tek midobun.

Nibi yad gipin tek niñid kidek ginimib agil gos nigup

¹⁴ Takaw ñu kil tikebin awl, nibop agineknin neben dinimib agil ma tikebin. Nibi ñapay mapen yad yibil agil, timud wukilig kiles gil agñitep gililig tikebin.

¹⁵ Pen bi kuñay yibil kili nibop nap adik tek midil, Klays yil midebim ak kod yebilap, nap nibi ak kuñay ma mideb. Yad nokom takaw teplep ak

4:10 Apo 26.24, 1 Ko 1.18, 3.18 **4:11** Apo 23.2, Lom 8.35, 2 Ko 11.23-27, Plp 4.12 **4:12** Sng 109.28, Mat 5.44, Apo 18.3, 1 Ko 9.14-15, 1 Te 2.9, 2 Te 3.8, 1 Ti 4.10 **4:13** Kra 3.45 **4:15** Apo 18.11, Gal 4.19, Jem 1.18

agñenek niñid, Klays Jisas nop dil chig tep gipek. Anib ak yad nap nibi, nibi ñipay yad.

¹⁶ Anib ak tek kiles gil agniñid agebin, yad gipin tek niñid kidek ginimib.

¹⁷ Adek anib ak nep, ñi mapen yad Timoti nop agyokinek. Bi anib ak ne bi tep yibil midil, Biawl wog ak gitep gup ak. Nop agyoken, am nibop niginigab. Pen yad Klays nop chig tep gil pel gipin tek, ne nigtep gil, am gos timud nibop ak pag yikek niginigabim. Pel gipin anib ak, Klays binib ne man keke pelpel apnan gipal okok kilop agñibin.

¹⁸ Nibi oginap Pol ne ke chinop ma ownigab agil, yib kili ke dad aplanil, biawl yibil midobun agebal.

¹⁹ Anigebal ak pen, Biawl ak yaw agenigab, wulep mideb yad apil nibop niginigayn. Pen ñin anib ak amjakil, bi yib kili dad aplanebal okok takaw kili ak niginig ma ownigayn. Kiles kili tay tek mideb niginig ownigayn.

²⁰ Niñid apin, God binib dil kilop kod yenigab ak, takaw nep agep mel. Anib ak tap kiles timel yibil mideb.

²¹ Yad apil nibop tay ginim? Yil kodim dil nibop pakinigayn akan? Mapen lil nibop takaw sayn aginig ownigayn akan?

5

Bi kili olap nap bin ne ak nop dil ayip kinibil

¹ Yip agñel nepin, bi nibi olap tap timel yibil gilig, nap bin ne ak nop dil ayip kinibil. Nigim. Binib God

4:16 1 Ko 11.1, Plp 3.17, 1 Te 1.6, 2 Te 3.9 **4:17** Apo 19.22, Plp 2.19-22 **4:19** Apo 18.21, 19.21, 1 Ko 16.5, 2 Ko 1.15, 1.23, Hib 6.3

4:20 1 Ko 2.4, 1 Te 1.5 **5:1** Wkp 18.7-8, Lo 22.30, 27.20, Epe 5.3

nop kidek ma gipal okok abe, tap timel yibil anib ak tek ma gipal.

² Taynen tap timel anib ak niñid, yib nibi ke dad aplanibim? Chib gek chañ lipikep. Anigil nim, bi anib ak nop diyokem, nib ayip ma yonimuj.

³ Yad man palawl midebin ak pen, gos yad ak nibop yil amnakniñ, nigilig midebin. Anib ak yad ke nib ayip midobun ak nep tek, bi ak ne tap timel gup anib ak, yad nop bilokil nepin.

⁴ Nibi Biawl chin Jisas nop gos niñid apnan ginigabim ñin ak, Biawl chin Jisas kiles awl ne ak ayip, gos yad ak ayip yenigabim.

⁵ Ayip midil, bi anib ak nop Satan ñin adek ak ablem mubwak nop ak gi timel ginimuj. Anigem, Biawl kot awl gep ñin ak, God bi anib ak kawnan nop ak tig asik dinimuj tek linigab.

Kili bi timel yibil gup ak nop diyokinigel

⁶ Pen yib nibi ke dad aplanibim anib ak, tap timel yibil. Binib bilet ginig, tap yis ak sikol sikol bad oginap sek lipal. Lel, tig adik madik gek bilet awl yibil tan aplanub ak, nibi ma nepim akan?

⁷ Anib ak binib kili yis nedil diyokipal tek, nibi tap si tap timel diyokinimib. Diyokem, bilet yis sek ma mideb tek yenimib. Pen yad nepin, nibi bilet yis sek ma mideb tek midebim. Ñin awl Pasopa apal ak, ñin anib ak chag sipsip ñiluk pak sibogoligipun. Pen nib nepim, pak sibogoligipun tek, kili Klays nop dil, chag sipsip ñiluk tek paklel chinop nen kumak.

5:3 Kol 2.5 **5:4** Mat 16.19, 18.18, Jon 20.23, 2 Ko 13.10 **5:5**
 Apo 26.18, 1 Ti 1.20, 1 Pi 4.6 **5:6** 1 Ko 3.21, 15.33, Gal 5.9, Jem 4.16
5:7 Kis 12.5, 12.21, 13.7, Ais 53.7, Jon 1.29, 1 Pi 1.19, Lep 5.6, 5.12

8 Anib ak tek, chin binib kili ñin awl tap gilitap gil miñmiñ gipal tek ginigun. Binib kili ñin awl ginig, yis nedil diyokipal tek, chin tap si tap timel midupsek diyokil, tap timel keke gipun adek anib okok diyokinigun. Pen gos teplep pal ak sek, takaw niñid yibil ak sek kidek ginigun. Aniginigabun ak, bilet yis sek ma mideb tek yenigabun.

9 Yad nibop ned mij tikil aginek, Binib bin si bi si gipal okok, takaw dayday ma agil ayip jimñil ma yenimib aginek.

10 Nib pen binib bin si bi si gipal okok, binib tap chin ke kuñay yibil dun agil nepal okok, binib tap si dipal okok, binib tap yepis sibog ñibal okok, binib lum awl anib okok ayip jimñil ma yenimib agil, takaw anib ak nibop ma agebin. Mel yibil. Lum awl midupsek midebal tek, kilop keliginimib tek ma lup.

11 Takaw yad aginek ak pen jij anigil mideb. Binib Klays binib ne nab okok midil mam ay chin apim okok, kili tap timel anigenigabal, takaw dayday ma agil ayip jimñil ma yenimib. Binib kili chin Klays binib ne midobun apal anib okok, kili bin si bi si gil, tap chin ke kuñay yibil dun agil niñid, tap yepis sibog ñil, binib agjuwil takaw timel agil, ñig kiles ñibil sawl lil, tap si dil, tap timel anib okok genigabal, takaw dayday ma agil ayip jimñil ma yenimib. Pen kili ayip tap ma yibil ñinjinimib.

12-13 Binib Klays yil ma midebal okok, yad tay-

5:8 Lo 16.3, Mat 16.6, 16.12, Luk 12.1 5:9 Mat 18.17, 2 Ko 6.14, Epe 5.11, 2 Te 3.14 5:10 Jon 17.15, 1 Ko 1.20, 10.27 5:11 Mat 18.17, Lom 16.17, 2 Te 3.6, Tat 3.10, 2 Jo 10 5:12-13 Lo 13.5, 17.7, 21.21, 22.21-24, Mak 4.11, 1 Ko 6.1-4, Kol 4.5, 1 Te 4.12, 1 Ti 3.7

nen anigipim agil, tig asik lil ag ginim tek ma lup. God nokom nim, takaw anib okok tek kilop aginigab. Pen binib Klays yil midebal okok, kili titay gipal ak nibi niñid tig asik lil, takaw anib ak tek aginimib tek lup. Buk Baybol ak tikil anib agak, Bi nibi tap si tap timel gup anib ak nop diyokinimib agil tikak.

6

Binib Klays yil mideb olap, binib Klays yil olap nop kot ma ginimun

¹ Pen bi nibi olap, ne mam Klays yil mideb olap ke nop takaw oginap mideb ak, taynen bi nibi Klays yil midebim okok ma agnigup, bi Klays yil ma midebal okok kilop damek kot nepal. Ne anigek nop nebeñ ma gup akan?

² Binib Klays yil midebal okok, kili kidek binib lum awl okok kilop midupsek bilokinigabal. Takaw anib ak ma nepim akan? Pen nibi binib lum awl okok kilop midupsek kidek anigenigabim, taynen miñel sikol tek nab nibi okok mideb ak, bilokinigun tek ma lup agil gos nepim?

³ Chin kidek ensel okok kilop abe bilokinigabun ak, anib ak ma nepim akan? Aniginigabun tek, chin miñel lum awl okok midupsek mideb ak niñid, bilokinigun tek lup.

⁴ Anib ak binib nab nibi okok takaw oginap mideb ak, taynen miñel anib ak damil, binib God nop gos ma nepal okok kilop agem kot nepal?

⁵ Yad takaw olap agen nibop nebeñ ginimun. Bi nibi gos nigep olap, ne binib nibi takaw oginap

midebal okok kilop niñid bilokup ak, bi anib ak olap ma mideb akan?

⁶ Nibi pen mam oginap tikjakil mam oginap kilop damil, binib God nop gos ma nepal okok kilop agem kot nepal.

⁷ Nibi Klays binib ne okok penpen kot gipim, anib ak nopun, nibi Klays ne gup tek ak keligil apyap pakipim. Nibop gi timel gil akan, tap nibop okok pilig del, taynen ma keligipim?

⁸ Nibi pen kilop gi timel gilig, tap kili okok dinig, kilop kot gil tap pilig dipim. Pen binib yokip okok nep kilop ma gipim, Klays binib nibi okok ke kilop anigil gi timel gipim.

⁹ God binib dil kilop kod yenigab ñin ak, ne binib tap si tap timel nep gipal okok kilop ma dinigab. Anib ak ma nepim akan? Gos nigtep ginimib. Binib bin si bi si gipal okok, binib tap yepis sibog ñibal okok, binbi kili dipal ak pen bin si bi si gipal okok, bi penpen chib migan gipal okok,

¹⁰ binib tap si dipal okok, binib tap chin ke kunay yibil dun agil nepal okok, binib ñig kiles ñibil sawl lipal okok, binib agjuwil takaw timel apal okok, binib tap kilop tig asik si dipal okok, God binib dil kilop kod yenigab ñin ak, anib okok kilop ma dinigab.

¹¹ Ned nibi oginap anib ak tek geligipim ak pen, timel gipim gach ak God wik yokup. Yokilig gek, nibi binib suntep ne yibil midebim. Biawl Jisas Klays ayip God chin Kawnan ne ak ayip kiles kili

6:7 Mat 5.39, Snd 20.22, Luk 6.29, Lom 12.17-19, 1 Te 5.15, 1 Pi 3.9

6:9 Gal 5.19-21, Epe 5.5, 1 Ti 1.9, Hib 12.14, Lep 22.15 **6:11** Epe 2.2, Kol 3.7, Tat 3.3-7, Hib 10.22

ak dil nibop gek, God ayip jimñil midil binib tep ne takaw ma mideb okok midebim.

Chin God Kawnan ne ak kal migan tep ne tek ak midobun

¹² Bi oginap apal, Yad titay ginig, takaw ma mideb, yad ke ginim tek lup apal. Niñid apal ak pen, adek oginap gil midtep ginigel tek ma linigab. Yad tap okok midupsek ginim tek lup ak pen, tap olap gen yip dil kodek, bi wog giñeb nop ak ma yenigayn.

¹³ Pen bi oginap apal, Tap midup nibun ak chibol nab ayan amub, chibol ne tap midup ak dup apal. Niñid apal ak pen, God gek tap midup ak sek, kogmeg ak sek ma yenigab. God ne binib gilak ñin ak, bin si bi si dinigel agil ma gilak. Binib mubwak kili ak Biawl yil midil, wog ne ak gebal. Pen Biawl ne mubwak kilop kod mideb.

¹⁴ God kiles ne ak dil Biawl kumak ak nop gek tikjakak. Pen chinop abe anigek tikjakinigabun.

¹⁵ Mubwak nibi okok, Klays wak ñin kid tob kid ne okok midebim. Ak nibi niginimib tek lup. Anib ak pen, taydil Klays wak ñin kid tob kid ne okok dad amil, kanibtam bin ayip jimñil linim? Anib ak ma yibil ginim.

¹⁶ Pen anib ak nibi niginimib tek lup, bi olap kanibtam bin ayip chigil jimñil midebil ak, ominal wak nokom yibil lup. Buk Baybol ak tikil anib agak, Kili ominal jimñil midel wak nokom yibil linigab agil tikak.

6:12 1 Ko 10.23 **6:13** Lom 14.17, 1 Ko 6.15, 15.19-20, Kol 2.22-23, 1 Te 4.3-7 **6:14** Lom 6.5, 6.8, 8.11, 1 Ko 15.20, 2 Ko 4.14, Epe 1.19-20

6:15 Lom 12.5, 1 Ko 12.27, Epe 4.12, 4.16, 5.30 **6:16** Stt 2.24, Mat 19.5, Epe 5.31

17 Bi olap pen Biawl nop chigil jimñil midebil ak, kili omiñal gil gos nokom niñid kawnan nokom midebil.

18 Bin si bi si dep ak asik tep ginimib. Tap si tap timel okok midupsek binib kili pel gipal ak, mubwak kili seņ okok mideb ak pen, bin si bi si dipal ak, mubwak kili ke gel timel ginigab.

19 Nibi niginimib tek lup, God Kawnan ne ak agyokek, nibop apil miğan ayaņ mideb. Ak nim, kal miğan tep ne tek ak midebim. Anib ak nibi ke mel, God yil midebim.

20 God nibop tawil tig asik dup, anib ak tek mubwak nibi okok dil God nop ñil, God yib awl dinimuņ agil gitep ginimib.

7

Bi bel omiñal okok takaw agup ak

1 Yip mij tikil takaw agnepek ak, nibop pen aginigebin. Bi okok bin ma dil ginigabal ak, tep mideb.

2 Binib pen bin si bi si del tap timel anib ak awl gup. Anib ak tek, bi okok bin kili ke dil midakniņ yenigabal, bin okok bi kili ke dil midakniņ yenigabal.

3 Bin ne nigimil ayip kinig agek, yaw agil kinigayl, nigimil bin ne ayip kinig agek, yaw agil kinigayl.

6:17 Jon 17.21-23, Lom 8.9-11, Epe 4.4 **6:18** Lom 1.24, 6.12-13, 1 Te 4.3, Hib 13.4 **6:19** Lom 14.7-8, 1 Ko 3.16, 2 Ko 6.16 **6:20** 1 Ko 7.23, Gal 3.13, Plp 1.20, Hib 9.12, 1 Pi 1.18-19 **7:1** 1 Ko 7.8, 7.26
7:3 Kis 21.10, 1 Pi 3.7

⁴ Pen nigimil mubwak ak ne ke mel, bin ne ayip tap kili jimñil, bin ne mubwak ak abe ne ke mel, nigimil ayip tap kili jimñil.

⁵ Anib ak nigimil agek bin ne mel ma aginimuñ, bin ne agek nigimil mel ma aginimuñ. Yaw agil kinimil. Pen ñili ñin wulep ak God nop gos niñid agnigilig midol agil, takaw ag adek nokom lil, nop agnigilig yenimil. Agnigilig yenimil ak pen, kidek ñin wulep ak tepayan ayip kinigayl. Mel ak Satan nibop gek, mubwak nab okyan ke kod ma midil, apyap pakinimil tek linigab.

⁶ Takaw agebin anib ak pen, takaw kiles olap nibi anigil anigil ginimib ak ma agebin. Gos nibi kidek ginimib agil nibop agebin.

⁷ Yad anigil gos nepin, binib okok midupsek kili yad yokip midebin tek yenigel. Anigil gos nepin ak pen, God gos ne ke nigup tek, binib okok kilop kiles keke ñub. Binib oginap kiles tep olap ñek, adek oginap ke gipal, binib oginap kiles tep olap ke ñek, adek oginap ke gipal.

⁸ Pen bin piñ bi pilaj midebal okok sek, bin kanil okok sek kili yad yokip midebin tek yenigabal ak, tep mideb.

⁹ Binib oginap pen yokip midil, bin si bi si gun agil gos ak nep apek, midtep ma ginigabal. Anigonimuñ, bin okok bi kili keke dinigel, bi okok bin kili keke dinigel. Mel ak nab kili ayan mab tek yinek, midtep ma ginigabal.

¹⁰ Bi bel ominal okok, kilop takaw kiles olap aginigebin. Yad nep mel, Biawl ak takaw ne. Bin

7:5 Jol 2.16, Sek 7.3, 1 Te 3.5 **7:7** Mat 19.12, Apo 26.29, 1 Ko 12.11 **7:9** 1 Ti 5.14 **7:10** Mal 2.14-16 **7:10** Mat 5.32, 19.9, Mak 10.11-12, Luk 16.18

ak nigimil nop ma kelig amnimun.

¹¹ Pen kelig amonimun, bi kideyil ma dinimun. Yokip yonimun. Pen bi dinig, adikid amil, nigimil ned nib anop tepayan dinimun. Pen bi abe, bin ne nop ma agyokinimun.

¹² Pen binib oginap takaw olap aginigebin. Biawl takaw kiles ne ak mel, takaw yad nep aginigebin. Bi Klays yil mideb olap, ne bin Klays nop gos ma nigup olap nop ned diyek, bin ne chil ayip yonigabul agil gos nigup ak, bin ne anib ak nop ma agyokinimun.

¹³ Pen bin Klays yil mideb olap, ne bi Klays nop gos ma nigup olap nop ned diyek, bine chil ayip yonigabul agil gos nigup ak, bine anib ak nop ma kelig amnimun.

¹⁴ Kili anigenigel, bi Klays nop gos ma nigup ak, bin Klays yil mideb ak ayip di midebil ak nim, God bi anib ak nop gek bi suntep ne yibil mideb. Pen bin Klays nop gos ma nigup ak, nigimil Klays yil mideb ak ayip di midebil ak nim, God bin anib ak nop gek bin suntep ne yibil mideb. Kili pen anib ma genigel, God nigeek nipay kili okok gach sek midebal. Ak pen genigel, takaw ma mideb God nipay kilop dinimun tek nep yenigab.

¹⁵ Bi bel ominal pen dil midebil okok, nigimil nep Klays nop gos linigup ak, bin ne Klays nop gos ma linigid, kiles gil nigimil nop kelig amnig gonimun, yaw agek amnimun. Pen bin Klays nop gos linigup ak, bine Klays nop gos ma linigid, kiles gil bin nop kelig amnig gonimun, yaw agek amnimun. Bin yad agil, biyad agil ma di tibikinimib. God ne nibi

kimigel midtep ginimib agil nibop aglup, anib ak kilop keligem amnigel.

¹⁶ Pen nad bin God yil mideban ak, nigimil ayip nep mide, God nop chigek tig asik dinimun tek lup akan? Anib ak ma nepan. Nad bi God yil mideban ak, bin nad ayip nep mide, God nop chigek tig asik dinimun tek lup akan? Anib ak ma nepan.

God gos ne niñid chinop aglup tek yonigun

¹⁷ Klays binib ne pelpel apnan gipal man okok midupsek, kilop pel agñibin, Nibi nokom nokom titay gil tek midem, God nibop aglil suk agil dak ak niñid, adek anib ak nep gilig yenimib apin.

¹⁸ Bi wak tibilikel God kilop suk agil dup okok, tepayan ñil yu ma ginigel. Pen bi wak sek midel kilop suk agil dup okok, wak ma tibilikinigel.

¹⁹ Bi wak tibilikipal akan ma tibilikipal, omiñal gil tap yokip takaw ma mideb. Binib pen God agup tek niñid kidek gipal ak, tap awl yibil.

²⁰ Ned titay gil tek midem God nibop suk agil dak ak, adek anib ak nep gilig yenimib.

²¹ Nibi oginap binib wog giñeb biawl olap muk okok midebim ak, ñin anib ak God nibop suk agil dup akan? Anigil nim, gos kuñay ma niñid, muk okok yenimib. Pen kidek nibop agyokek, nop keligil am binib wog gep biawl olap muk okok ma midenimib tek lonimun, keligil yokip am yenimib.

²² Binib wog giñeb biawl olap muk okok midebal ak, God kilop suk agil dek Klays nop chigipal okok, Biawl ak kilop nigek binib wog gep biawl olap muk

okok ma mǐdebal. Anǐb ak tek nep, binǐb wog gep biawl olap muk okok ma mǐdebal ak, God kilop suk agil dek Klays nop chigǐpal okok, Biawl ak kilop nǐgek binǐb wog giñeb Klays muk okok mǐdebal.

²³ God nǐbop tawil tig asik dek, binǐb ne mǐdebim. Anǐb ak nǐbi binǐb wog giñeb muk okok tek ma yenimib.

²⁴ Mam ay sikop, ned titay gil tek midem God nǐbop suk agil dak ak, God ayip jimñil midilig adek anǐb ak nep gilig yenimib.

Bin piñ bi pilaj okok takaw agup ak

²⁵ Pen bin piñ bi pilaj okok takaw ak aginigebin. Takaw anǐb awl Biawl ak agek niñid nǐbop ma aginigebin. Ne pen yip mapen niñid ditep gek, bi takaw niñid yibil agep ak mǐdebin ak nim, gos yad nepin ak kidek gil nǐbop aginigebin.

²⁶ Miñil koslam mǐdep tek lup ñin awl ak niñid, gos yad anigil nepin, nad mǐdeban tek nep yenimin, ak tep yibil.

²⁷ Nad bin dipan tek, nop agyokil yokip miden agil gos ak ma niginimib. Pen bin ma dipan tek, bin dun agil gos ak ma niginimib.

²⁸ Nad pen bin denimin, tap timel ma gipan, bin piñ bi donimun, tap timel ma gup. Binǐb dipal okok pen, lum awl midil miñel keke dinigabal. Yad gos anǐb ak niñid, nǐbi miñel anǐb okok ma dinigabim agil anǐb agebin.

29 Pen mam ay sikop, yad anib agebin, ñin ak wulep mideb. Anib ak miñil tikjakil mid dad amil, bi bin dipal okok kili bin ma dipal tek yenigel.*

30 Pen bi chib gek chan lup okok, kilop chan ma lep tek yenigel. Pen miñmiñ gipal okok, kili miñmiñ ma gipal tek yenigel. Pen tap tawpal okok, kili binib tap ma mideb tek yenigel.

31 Pen tap lum awl nigilig dilig midebal okok, kili wog tap anib okok nigon tap awl tek ma lonimun agil gos niginigel. Chin nopun, lum awl tap okok midupsek pisnep kul ginigab ñin ak wulep mideb.

32 Pen nibop miñel awl ma gek gos kunay ma niginimib agil gos nepin. Bi bin ma dup ak, ne Biawl tap ne okok gos nigeek amek, titay gen Biawl nop tep ginimun agil nigup.

33 Bi bin dup ak pen, ne tap lum awl ak gos awl nigeek amek, titay gen bin yad ak nop tep ginimun agil nigup.

34 Anigeek, ne gos omiñal nigup. Pen bin piñ okok sek bin bi sek ma midebal okok sek, kili Biawl tap ne okok gos nigel amub. Gos abe mubwak abe nop nep ñinig, Biawl mideb ak am yonigun agil nepal. Bin bi dup olap pen, ne tap lum awl ak gos awl nigeek amek, titay gen biyad ak nop tep ginimun agil nigup.

35 Takaw agebin anib awl, nibop mel agil ma agebin. Nibop giñinig agñen midtep ginimib agil agebin. Pen Biawl ak nop pel gos nigilig wog gitep

7:29 Lom 13.11 * 7:29 Chin bi bin dipun okok, bin kilop nep gos ma niginigun. Biawl wog nop, tap ne okok abe gos niginigun. Pol ne gos anib ak niñid, takaw anib awl agup. 7:31 Sng 39.6, Jem 1.10, 4.14, 1 Pi 1.24, 1 Jo 2.17 7:34 Luk 10.40

yibil ginimib agil gos nepin. Yokip ak gos omiñal niñid, nop ditep ma ginigabim.

³⁶ Pen bi olap yokip yek, nop bin aglil dap ñel, yad bi woske yenigayn agil, mid dad amil, bin anib ak nop nigek midep tek ma lek niñid, dinigab ak tep. Tap timel ma gel takaw ma mideb.

³⁷ Bi woske anib ak pen kiles gil midil, nop ne-neb gil mel, gos ne ke kod midtep gil, bin yip aglipal ak ma din agil gos niñid kiles yibil gil yenigab ak, abe takaw ma mideb. Ne abe tep yibil ginigab.

³⁸ Anib ak bi bin nop aglilak ak dup ak, tep gup. Bi pen bin nop aglilak ak ma dup ak, tep yibil gup.

³⁹ Bin olap nigimil ne midakniñ, ayip nep yenimil. Kumonimun nep nim, am bi kidek dinig, dinimun. Pen bi Biawl ak yil yonimun olap nep dinimun.

⁴⁰ Yad pen gos anigil nepin, ne yokip mideb tek yonimun ak, nop tep yibil ginimun. Pen yad nokom mel, God Kawnan ne ak yip gos ñakniñ agebin tek lup.

8

Tap yipil, tap yepis agnepal okok pak sibogipal ak, ñiñinigun akan mel apal?

¹ Pen tap yepis agnepal okok, kilop tap yipil pak sibogipal ak ñiñinigun akan ma ñiñinigun agil yip agnepim. Takaw anib ak, nibop pen aginigebin. Nibi oginap apim, Chin midupsek binib gos nigep midobun apim. Takaw anib ak niñid apim ak pen, binib gos nigep midebal okok, yib kili ke dad

aplanil, chin binib awl yibil midobun agil nepal. Binib pen mapen lep midebal okok, kili anigel, mapen lep anib ak binib kilop gek, gos sek midil kiles gil jak tep gil midebal.

² Bi gos nigep yib midebin agup ak, takaw niginimuṅ anib ak gos nigtep ma gil, anib agup.

³ Bi pen God nop mapen lup ak, God bi anib ak nop gos nigtep gup.

⁴ Anib ak, tap yepis agnepal okok, kilop sab chag yipil pak sibogipal ak ñiniginun akan ma ñiniginun agil, takaw oginap nibop aginigebin. Chin nopun, tap yepis agnepal anib okok tap yibil mel, kawnan yokip mideb. Pen god kuṅay ma midebal, God ne nokom nim mideb.

⁵ Binib okok tap chin agnopun nim ak agil, biawl chinop kod yonimuṅ nim ak agil, tap keke wisip alaṅ lum awl kuṅay okok agnepal.

⁶ Tap agnepal kuṅay okok midebal ak pen, God chin ak nokom yibil mideb. Ne Bapi chin tap okok midupsek gilek mideb. Ne midakniṅ chin midobun. Pen Biawl abe nokom yibil mideb, Jisas Klays nim. God gek Klays ne tap okok midupsek gilak. Pel anigek chin konim midobun.

⁷ Pen binib oginap takaw agosipun anib ak gos ma nepal. Kili ned tap yepis agnepal okok gos niṅid kidek geligipal. Anib ak tek, tap yipil binib ke oginap sibogil pakipal anib okok, tap yepis agnepal okok tap kili ak. Pen tap yipil anib okok dil ñibebal won ak, chin God yil midobun tek tap

8:2 1 Ko 13.8-9, 13.12, Gal 6.3, 1 Ti 6.4 **8:3** Nah 1.7, Mat 7.23, Gal 4.9 **8:4** Lo 4.35, 4.39, 6.4, Ais 41.24, 1 Ko 10.19, Gal 4.8, Epe 4.6, 1 Ti 2.5 **8:6** Mal 2.10, Jon 1.3, Apo 17.28, Lom 11.36, 1 Ko 12.6, Epe 4.5-6, Plp 2.11 **8:7** Lom 14.14, 14.23, 1 Ko 10.28-29

sibogil pakıpal ak ñiñinigun agil, gos pal ak timel won ak nig midilig ñibebal.

8 Tap ñiñeb ak pen, chinop gek God mideb wulep sıñak amnigun tek ma linigab. Chin tap ma ñibonigabun, God nıgek gach sek yonigun tek ma linigab. Pen chin tap ñibonigabun, God nıgek midtep yonigun tek ma linigab. Tap asikil akan monmon ñibonigabun, takaw ma yenigab.

9 Nibi pen nigtep ginimib. Nib nepim, tap ñiñeb titay ñiñinigun agil, ñiñinimib tek lup. Pen tap olap ñibem, binib Klays yıl nop gos kiles ma nepal okok niñid abe ñibil, apyap pakinigel tek lup ak niñid, tap anib ak ma ñiñinimib.

10 Nibi binib nigtep gipim okok, ñin ogınap am tap yepıs agnepal kal migan ak amıl tap ñibim. Pen ñibenigabım, Klays binib ne olap ne gos pal ak timel won ak nig mideb ak apil, nibop nıgek chıbol nop tikjakek, ne abe tap sibog pakep anib ak ñiñeb tek linigab.

11 Nibi tap ñiñeb gos anib ak niñid anigem, mam ay Klays nop gos kiles ma nepal okok niñid kul ginigabal. Pen mam ay anib okok, Klays kilop dinim agil kumak.

12 Pen aniginigabım ak, mam ay okok kilop gi timel gil, gos pal ak telep won ak nig midebal ak gem, Klays nop gos linigep ak apyap pakinigabal. Pen kilop nep gi timel ginigabım mel, Klays nop abe gi timel ginigabım.

13 Anib ak, tap ñiñeb titay okok ñiben, mam ay ogınap kilop gek apyap pakinigel tek lenigab, tap

yipil anib okok pel pelnep ma ñinim. Yad tap ñibil mam ay okok kilop gek apyap pakinigel agil, gos anib ak ma yibil nepin.

9

Pol ne Jisas biawl olap yek ak pen, mani oginap nop pen ma ñel, nop tep gup

¹ Nibi yip ninid nigtep ginimib. Tap olap yip kanib ma tikup. Yad bi Jisas takaw nop dad ameb ak midebin. Yad Jisas Biawl chin ak nop widin nepin. Yad Biawl nim ak wog ne gen, nibop gek binib ne midebin.

² Binib oginap yip bi yokip agil nigenigel tek lup ak pen nibi mel. Nigtep gipim, yad bi Jisas takaw nop dad ameb ak midebin. Yad nibop Biawl takaw ak agenek ninid nop dil ayip midebin. Anib ak tek nib nepim, yad bi Jisas takaw nop dad ameb olap midebin.

³ Binib yip tig asik lil takaw awl apal okok, kilop pen anigil apin.

⁴ Chin bi Jisas takaw nop dad ameb okok, binib kilop wog ginibun tek, tap midup ñig tap okok pen dinigun tek lup akan?

⁵ Pen chin bin Klays nop gos linepal okok dil, dad Klays takaw agni ajonigun tek lup akan? Bi Jisas takaw nop dad ameb oginap sek, Biawl ak nimam kidek ne okok sek, Pita sek, kili pel bin kili okok sek dad ajipal, anib ak tep mideb.

⁶ Banabas chilmanjal nep kanib olap ma yek, mani wog piskid ak gilig tap ñibul akan?

9:1 Apo 9.3, 9.15-17, 18.9, 26.16, 1 Ko 15.8, 2 Ko 12.12, Gal 2.7-8

9:2 2 Ko 3.2-3

9:4 Luk 10.8, 1 Ko 9.13-14

7 Bi chim kadiņ gep olap wog gup tek, tap ne ke ma piyow nigup. Nop tap nel ñiņub. Bi tap yimub ak, yokip yek tek ma lil, yimub tek pipag dapil ñiņub. Bi chag sipsip mukup ak, yokip yek tek ma lil, mukup tek tul ne ñiņub.

8 Takaw agebin anib ak, binib gos timud ke niņid apal tek ma agebin. Mel yibil. Takaw Mosis ñu kil tikak ak abe anib ak tek agak.

9 Takaw Mosis ñu kil tikak miņan ayaņ, aniņil tikil agak, Nibi chag bulmakaw poņid apil, wit midup tap okok taw chib jakek, midup okok ke amil, cheg okok ke amil gaņ agil, meg miņan nop ak ma tunig tibikinimib agil tikak. Wog gilig, oņinap ñiņiniņig ñiņiniņun agil tikak. Pen God chag bulmakaw okok gos niņid takaw anib ak ma agak. Mel.

10 Chinop gos niņid anib agak. Yaw, binib tiņil yul gil wog gi yibal okok sek, binib pag dad opal okok sek, chin tap oņinap ñiņiniņun agil, tep gakiņ wog giņigel. Anib ak chin nopun, takaw anib ak chinop gos niņid ñu kil tikak.

11 Chin God Kawnan tap telep ne ak nibop nab okok yibun tek, chinop pen mani tap lum awl mideb okok ñiniņabim ak tep yibil.

12 Bi keke oņinap kilop mani tap nibi okok ñibim tek, chinop nigem nibop tep yibil gek mani tap nibi okok chinop monmon ñiniņimib.

Pen chin nibop agniņid mani tap okok dipinop ak pen, anib ak ma dipun. Don, binib oņinap gos

9:7 Lo 20.6, 2 Ko 10.4, 1 Ti 1.18, 1 Pi 5.2 **9:9** Lo 25.4, 1 Ti 5.18

9:10 2 Ti 2.6 **9:11** Lom 15.27, Gal 6.6 **9:12** Apo 20.33-35, 1 Ko 9.15, 9.18, 13.7, 2 Ko 11.7-9, 11.12

timel niñid Klays takaw teplep ak ma niñinigabal agil, miñel kunay dil wog tawep gil tap taw ñibun.

13 Bi God agnigep kal awl migan wog gipal okok, God agnigep kal awl tap ñiñeb okok ñibal. Pen bi God nop sibogep abañ adek ak wog gipal okok, kili binib tap pak sibogipal okok oginap dil ñibal. Yad nepin, anib ak nigtep gipim.

14 Anib ak tek Biawl agek, bi takaw teplep agñibal okok, kilop pen tap ñel ñibilig nim, midtep gilig wog anib ak ginigabal.

15 Yad pen takaw teplep ak agñil mani tap midup dipinap ak, oginap ma dipin. Pen miñil abe mij tikebin awl, tap nibop oginap din agil ma agebin. Mel yibil. Nibi gos awl anib ak niñinimib tek lek, yip wak tibilikup. Anigek yad ned kubinap ak, tep yibil.

16 Pen takaw teplep agñibin won ak, yib yad ke dad aplanil miñmiñ ginim tek ma lup. Takaw teplep agñibin wog anib ak, Biawl ak ne wog anib ak yip agak ak nim yad ginim. Takaw teplep ak ma agñil nim, midtep ma gil kul ginigayn.

17 Wog anib ak yad ginim agil genigayn, tap teplep yip pen ñek dinigayn. Pen ak mel. Biawl wog ne gipin anib ak, ne ginimin agek nep gipin.

18 Anib ak, tap teplep tay yip pen ñek dinigayn? Takaw teplep ak agñil mani tap midup dipinap ak, ma dipin. Pen tap teplep yad tek nim, takaw teplep ak binib okok kilop yokip yibil agñen yip tep yibil gup.

9:13 Wkp 6.16, 6.26, Nam 18.8, 18.31, Lo 10.9, 18.1 **9:14** Mat 10.10, Luk 10.7, Gal 6.6, 1 Ti 5.17 **9:15** Apo 18.3, 20.34, 2 Ko 11.10, 1 Te 2.9 **9:16** Jer 20.9 **9:17** 1 Ko 3.8, 3.14, 4.1, Gal 2.7, Kol 1.25
9:18 1 Ko 7.31, 10.33, 2 Ko 4.5

Pol ne binib kunay yibil God yil yelan agil, bi wog giñeb kili tek mideb

¹⁹ Yad binib olap bi wog giñeb ne ma midebin ak pen, binib kunay yibil God yil yelan agil gos niñid, binib midupsek bi wog giñeb kili tek midebin.

²⁰ Juda binib midebal nab ak midil, God yil yelan agil, kili pel anigipal okok tek gipin. Yad takaw Mosis ñu kil tikak ak kidek ma gebin ak pen, binib takaw Mosis ñu kil tikak ak kidek gipal nab ak midil, God yil yelan agil, yad ayip wilikil midon yip nigel, bi kili olap tek lup.

²¹ Binib takaw Mosis ñu kil tikak ak kidek ma gipal nab ak midil, God yil yelan agil, yad ayip wilikil midon yip nigel, bi kili olap tek lup. Pen anigil kiles gilig God takaw agak ak ma keligipin, Klays agak ak nep gipin.

²² Binib Klays nop gos kiles ma nepal okok nab ak midil, God yil yelan agil, yad ayip wilikil midon yip nigel, bi kili olap tek lup. Yad binib okok kul ginigel tek lek niñid, oginap Klays nop del kilop tig asik dinimun agil, kanib okok midupsek piyow niñid, kili midupsek ayip wilikil midilig agñitep gipin.

²³ Yad nepin, Biawl ak kidek tap teplep ak dil, binib takaw teplep ak gos nepal okok kilop ñinigab. Pen yad abe ayip dinigayn agil gos nepin, takaw teplep wog anib ak midupsek gen kiles gil ameb.

Kiles yibil gil gon amek, tap teplep yibil dinigabun

24 Bi penpen taw asik lipal okok, midupsek penpen taw asik lipal ak pen, bi olap ned amjakil tap teplep ak dup. Anib ak nib nepim akan? Anib ak tek nibi tap teplep anib ak dinig, kiles gil penpen taw asik lipal tek ginimib.

25 Bi penpen taw asik lipal okok, kili keke yad ned amjakin agil monmon ma gipal. Asik tep gil, kiles timel yibil amil apil gil gipal. Pen tap teplep kili dinigun agil kiles gil anigipal ak, pel ma yenigab. Tap teplep yibil chin pen dinigun agil kiles gil wog ginigabun ak, pel pelnep yenigab.

26 Anib ak nim, yad penpen taw asik lil, kiles timel gil gipin. Ke okok ma nepin, amnig gipin migan ak nep ninid kasek abin. Pen bi nin penpen pakipal okok, monmon ma pakipal, nigtep gil penpen pakipal tek ak yad gipin.

27 Mubwak yad ke paken, gos timud yad nepin pal ak kidek ginimun. Binib oginap kilop agnen nepal ak pen, yad ke apyap pakil tap teplep ma dinigayn tek lup agil, nigtep gil nokom gen ameb.

10

Apis based sikop gi timel gil, apyap pakilak tek gos nigtep gil ma ginigun

1 Mam ay sikop, yad nibi gos anib ak nigtep ginimib agil gos nepin. Bi Mosis yek nin ak, apis based chin okok, God wisip bad tikil kilop midupsek yu gil kod yoligup. Pen kili midupsek

9:24 Gal 5.7, Plp 2.16, 3.14, 2 Ti 4.7, Hib 12.1 9:25 Epe 6.12,
Plp 3.14, 2 Ti 2.4-5, 4.8, Jem 1.12, 1 Pi 1.4, 5.4, Lep 2.10 9:27
Lom 6.18-19, 8.13, 13.14, 2 Ko 13.5-6, Kol 3.5 10:1 Kis 13.21-22,
14.22-29, Nam 9.18, Neh 9.12, Sng 78.13

amil, ñig solwala yib ne Nikim apal ak tikil kid adan amnilak.

² Pen kili midupsek wisip bad ak sek, ñig solwala ak sek ñig pakñeb tek migan ak gilak. Ñig pakñeb gak anib ak, kilop aglek Mosis binib ne okok yeligipal.

³ Pen kilop midupsek God Kawnan ne ak tap midup ñakniñ jimñil ñibeligipal,

⁴ ñig ñiñeb ñakniñ jimñil ñibeligipal. Ñig anib ak, God kab kili ayip ajeligipal ak gek, nab ak wikil apek ñiñilak. Kab anib ak nim, Klays nokom.

⁵ God pen kili kunay yibil gilak tek nigeek nop yilik gek, kilop gek, man nep binib ma yelak nab okok milep lil kumil, chip takil won ak am okok okok kum yeligipal.

⁶ Pen titay gak anib okok, chinop yomek niñid, kili tap timel okok dun agil gilak tek anigil ma yibil ginigun.

⁷ Kili oginap tap yepis okok sibog ñilig agnigilig gilak tek ma yibil ginimib. Anigilak anib ak, buk Baybol ak tikil agak, Binib okok kili besigil tap ñibilig, ñig ñibilig, tikjakil kigom pagilig yabal gilig gel amnak agil tikak.

⁸ Pen oginap bin si bi si gilak tek ma yibil ginigun. Anigilak ak nim, ñin nokom kili anep 23,000 okok kumilak.

⁹ Pen oginap Klays kiles ne anigep tek ma mideb agil gilak tek ma yibil ginigun. Anigelak ne gek, yoy

10:3 Kis 16.35, Neh 9.15, 9.20, Sng 78.24 **10:4** Sng 78.15 **10:5** Nam 14.16, 14.29-30, Sng 106.26, Hib 3.17, Jud 5 **10:6** Nam 11.4, 11.34, Sng 106.14, 1 Ko 10.11 **10:7** Kis 32.6, 1 Ko 10.14 **10:8** Nam 25.1-18, Sng 106.29, Lep 2.14 **10:9** Kis 17.2, 17.7, Nam 21.5-6, Lo 6.16

salaw okok kilop suwel kumilak.

¹⁰ Pen oginap pomil agil agilak tek ma yibil ginimib. Anigelak, ensel binib paklep ak apil kilop paklek kumilak.

¹¹ Pen apis based kilop titay gak anib okok, binib okok kilop yomek niñid, gos nigtep ginigel. Chin pen, lum awl gijunig ñin kidek ownigeb ñin ak midobun okok, God chinop niñid, kilop gos timud wuken gos nigtep ginigel agil gos nigak. Gos anib ak niñid, bi oginap kilop gek kesim anib okok buk Baybol migan ayan ñu kil tikilak.

¹² Anib ak nibi olap aginimin, Yad kiles gil jak midebin agenimin ak, apyap pakinimin tek lek nigtep yibil ginimin.

¹³ Tap si tap timel nibop lipig dad amnimun tek lup okok, nibop nep ma gup. Binib okok midupsek kilop anib ak tek gup. God pen agak tek midupsek kidek gil kod nep yenigab. Kod nep yenigab ak nim, ne gek, tap anib okok nibop lipig dad amil, nibop li tibikinimun tek ma linigab. Miñel apek nibi koslam yenigabim ak, God gek tap anib okok asik tep ginimib tek linigab.

God nop ayip tap yepis agnigep okok ayip kigom yimil agniginigun tek ma lup

¹⁴ Anib ak, binib mapen yad okok, tap yepis agnigep sibog ñeb ak asik tep ginimib.

¹⁵ Nibi binib gos timud sek midebim ak nim, takaw aginigebin ak, niñid akan agil, nibi ke bilokil niginimib.

10:10 Kis 16.2, Nam 14.2, 14.29, 14.37, 16.41-49, 1 Sto 21.15, Hib 3.11, 3.17 **10:11** Lom 15.4, 1 Ko 10.6, Plp 4.5, Hib 10.25, 10.37, 1 Pi 4.7, 1 Jo 2.18 **10:13** Jer 29.11, 1 Ko 1.9, 2 Pi 2.9 **10:14** 2 Ko 6.17, 1 Jo 5.21

16 Ñig kinag God agek midtep gup ak dil, God nop tep agil ñibun ak, ñig wayn kinag migan anib ak ñibun won ak chinop gek, chin jimñil midil Klays nikim ne chinop nen sogak ak ayip jimñil midobun. Pen bilet tipagipun ak, ñibun won ak chinop gek, chin jimñil midil Klays mubwak ne ayip jimñil midobun.

17 Bilet kid nokom yek, chin midupsek bilet kid nokom anib ak tipag ñibun. Anib ak chin binib kunay yibil mubwak nokom tek midobun.

18 Yislel binib gipal ak gos nigim. Chag sipsip tap okok dad apil, God nop sibogep abañ adek ak siboginig pakipal ñin ak, binib apil ayip ñibal okok, gos adek nokom yek nim, jimñil God nop sibogilig ñibal.

19 Takaw agebin ak nepim akan? Binib God nop ma nepal okok, tap pak sibog, tap yepis agnepal okok ñibal ak, tap ninid yibil agil nibop ma agebin. Pen tap yepis agnepal okok abe, tap ninid yibil agil nibop ma agebin. Mel yibil, tap anib okok tap yokip.

20 Yad pen anib agebin. Binib God nop ma nepal okok, tap yepis anib okok tap pak sibog ñibal okok, kili kicheki walippal tap okok nep pak sibog ñibal, God nop pak sibog ma ñibal. Anib ak nim, nibi kicheki okok ayip jimñil nokom anib anep yenigabim ak, tep ma yibil ginigab agil anib agebin.

21 Biawl ñig wayn kinag chinop ñub ak sek,

10:16 Mat 26.26-28, Mak 14.22-24, Luk 22.19-20, Apo 2.42, 2.46

10:17 Lom 12.5, 1 Ko 12.27, Epe 4.16 **10:18** Wkp 7.6, 7.15

10:19 1 Ko 8.4 **10:20** Lo 32.17, Sng 106.37, Lep 9.20 **10:21**

Lo 32.38, 2 Ko 6.15-16

kicheki okok ñig kınag ñibal ak sek, omıñal gil ñiñinimib tek ma lup. Biawl bilet chinop ñub ak sek, kicheki okok tap ñıñeb ñibal ak sek, omıñal gil ñiñinimib tek ma lup.

²² Anıgıñıgabun ak, Biawl ak chıbol timel gek chinop milik niğañ agil gıñıgabun akan? Chin pen binib kiles timel yibil midobun, God bi kiles sikol gup ak agil, anib ak tek gıñıgun akan? Mel yibil.

God nop yib awl ak pelpel ñinıgun

²³ Binib oğınap apal, Chin titay gıñıg, takaw ma mideb gıñıgun tek lup apal. Niñid apal ak pen, adek oğınap gil midtep gıñıgun tek ma linıgab. Chin tap okok midupsek gıñıgun tek lup ak pen, anıgil monmon gon binib chin oğınap niñid, gos sek midil kiles gil jak tep gil yonıgun tek ma linıgab.

²⁴ Chin ke midtep gıñıgun agil gos ak ma niğinimib. Binib okok abe midtep gılanı agil gos ak niğinimib.

²⁵ Yıpil tap okok dapil maket lipal okok, monmon tawil ñiñinimib. Tap yepis agnıgep okok sibogil dapil maket lipal akanı agil gos awl ak niñid, takaw anib ak ma agniğinimib.*

²⁶ Taynen? Chin nopun, buk Baybol ak tikil anib agak, Lum awl sek, tap okok lum awl mideb ak sek, anib okok midupsek Biawl tap ne nep agil tikak.

10:22 Lo 32.21, Ese 22.14 **10:23** 1 Ko 6.12 **10:24** Lom 15.1-2, 1 Ko 13.5, Plp 2.4, 2.21 * **10:25** Ñin oğınap, bi oğınap tap yepis agnepal okok tap pak sibog ñil, kidek dad amil maket ak lipal. Pol pen anib agup, Binib Klays yıl midebal okok, kili tap yıpil anib ak tawpal ak, niñid gos pal ma linıgel agup. Pen kili tawil ñibil, gi timel gobun agil gos ma niğinıgel agup. **10:26** Kis 19.5, Lo 10.14, Sng 24.1

27 Pen binib Klays nop gos ma nigup olap nibop aginimun, Apem tap ñinun agonimun, kal nop amnigun agil gos niginigabim ak, monmon amil, tap titay dapil ñinimun ak ñinimib. Tap yepis agnigep okok sibogil dad opal akan agil gos awl ak niñid, takaw anib ak ma agniginimib.

28 Pen am midil, bi olap nibop agil aginimun, Tap ñiniginobun awl, tap yepis agnigep okok pak sibogil dapil lipal agonimun, ma ñinimib. Nibi ñiniginig ñibikep ak pen, ne gitep gobun akan gi timel gobun gos kuñay niginimun tek lek, nop nen agil keliginimib.

29 Nibi tap anib ak ñibil nim, tap timel agil gos niginigabim ak ma agebin. Bi anib ak pen, ne nibi tap anib ak ñiniginabim ak niñid, kili tap timel gebal agil gos niginimun agebin. Pen nibi oginap aginigabim, Bi olap chinop taynen gos kuñay niginigab aginigabim? Taynen yad ginim agil gos nepin ak kidek ma ginim, bi anib ak gos ne ke ginimin agil gos nigup ak kidek ginim aginigabim?

30 Tap ñineb anib okok, God nop tep agil ñiniginabun ak, taynen bi olap chinop takaw timel agil agjunimun aginigabim?

31 Anib ak pen, tap ñiniginig akan, ñig ñiniginig akan, titay ginig, God nop yib awl ñinig anib okok midupsek ginimib.

32 Juda binib akan, binib Juda mel akan, God binib ne pelpel apnan gipal okok kilop gos niñid,

tap oginap gonigun kilop gek apyap pakinigel tek linigab agil, anib okok ma ginimib.

³³ Yad abe midupsek gipin ak, binib okok midupsek kili nigel kilop tep gan agil anigipin. Yad ke midtep gin agil gos ak ninid ma gipin. Yad pen binib kunay yibil midtep gilan agil gos ak ninid anigen, God kilop tig asik dinimuŋ.

11

¹ Yad Klays gup tek ninid kidek gipin tek, nibi yad gipin tek ninid kidek ginimib.

Bin okok kimig pak yu ginigel

² Pen nibi pel yip nigilig midil, God takaw nibop agñinek ak midupsek nig dil, nigilig yibil midebin. Anib ak tek yad agebin, Nibi tep yibil gebim agebin.

³ Pen takaw miñil aginigebin ak abe niginimib agil gos nepin. Klays ne bi okok midupsek kimig muk okok kili tek mideb, nigimil okok bin kimig muk okok kili tek midebal, God ne Klays kimig muk okok ne tek mideb.

⁴ Bi olap kimig pak yu gilig, God nop agup akan, God bi anib ak nop gos ñek agñub ak, ne anigek kimig ne Klays bi yokip kimig olap tek lup.

⁵ Bin olap pen kimig ma pak yu gilig, God nop agup akan, God bin anib ak nop gos ñek agñub ak, ne anigek kimig ne nigimil nim bi yokip kimig olap tek lup. Bin anigup ak, bin kimig ak misenj mideb tek nep midil, ominal gil neben gup.

10:33 Lom 15.2, 1 Ko 9.20-22, 10.24 **11:1** 1 Ko 4.16, Epe 5.1, Plp 3.17, 2 Te 3.9 **11:3** Stt 3.16, 1 Ko 3.23, 15.27-28, Epe 5.23, 1 Pi 3.1, 3.5-6

⁶ Pen bin olap kimig ma pak yu genigab, kimig wij ne ak tik wulep gonimunj. Ne pen kimig wij tik wulep gil akan pisnep tik yokek neben gonimunj tek, kimig pak yu ginimunj.

⁷ Bi ak ne God mideb tek midil, anigil midek God yib awl mideb ak misen yomeb, anib ak tek kimig ma pak yu ginimunj. Bin pen, bi yib awl mideb ak misen yomeb.

⁸ Chin nopun, God bin tigilem kid ak dil, bi ma gilak. Bi tigilem kid ak dil, bin gilak.

⁹ Pen abe, God bin giñeb ne olap ma yek bine nop gilinim agil, gos anib ak ma nigak. Bi giñeb ne olap ma mideb agil, bin ne nop gilak.

¹⁰ Anib ak tek, bin ak kimig pak yu gil midek, ensel nig midebal okok niginigabal, bine muk okok midilig God wog ne geb.

¹¹ Binib pen Biawl ayip jimñil midebal okok, bin kili ke midtep ginig ma gipal, bi kili ke midtep ginig ma gipal. Mel yibil. Bin kili bi giñeb midebal, bi kili bin giñeb midebal.

¹² God ned bi tigilem kid ak dil bin ak gilak ak pen, miñil bin okok kili midil chinop bi tik lipal. Pen God ne jij ak nim, binib tap okok midupsek ne gilek mideb.

¹³ Nibi ke takaw nim ak tig asikinimib. Bin olap kimig ma pak yu gilig God nop aginigab ak, tep ginigab akan?

¹⁴ Binib lum awl pel gipal ak nibop yomek nepim, bi ak kimig wij palawl yenigab, tep ma gek yib ne apyap pakinigab.

15 Bin pen kimig wij palawl jakonigab, kimig wij ne palawl ak tib kadig ñub tek yenigab. Yaw, God bin kimig pak yu ginimuj agil, nop kimig wij palawl ak ñub.

16 Binib olap pen takaw anib ak niñid, penpen agilig yonigun agil gos niñid nim, aginigebin ak gos nigtep ginimuj. Chin takaw olap ke kidek ma gipun, God binib ne pelpel apnan gipal okok abe takaw olap ke kidek ma gipal.

Kili Biawl tap midup sek ñig wayn sek ne ak ñiñinig, gitep ma gipal

17 Pen takaw oginap nibop agñilig aginigebin. Nibi God nop gos niginig apnan gipim ak, midilig gitep ma gipim. Tap nibi gipim anib ak, telep ma gup. Anib ak nibi gitep gem nigen yip tep gup agil ma agebin.

18 Yad ned nibop nim ak aginigebin. Takaw oginap agel nepin, anigil mideb, nibi Klays binib ne apnan gil takaw ne agñibim ñin ak, asik pis ak ke, pis ak ke lipim. Takaw apal anib ak, oginap gem niñid apal agil nepin.

19 Pen gos adek keke niñid asik pis ak ke, pis ak ke lem amnimuj anib ak, binib nibi an yil God nop chig tep gel nigeke nop tep gup okok kilop, misen yibil niginigabim.

20 Ak tek ak nibi apnan gil tap ñibim anib ak, Biawl tap midup sek ñig wayn sek ne ak ñibobun agil ñibim ak pen, yepis agil Biawl tap ne ma ñibim.

21 Taynen anib apin? Apnan gil tap ñiñinig ak pen, mam ay oginap kod ma yesipim. Oginap ned apil, tap nibi kasek dil keke ñibim. Anigeke, oginap

yuwan midilakniŋ, oŋinap tap awl ñibil ñig wayn kuŋay ñibil sawl lipim.

²² Titay dil? Kal nibi tap ñibilig ñig ñibilig gipim ak ma yek akan? God binib ne pelpel apnan gipal okok niŋid, kili tap yokip yibil agil aniŋipim akan? Mam ay yuwan nen midebal okok, kilop nebeŋ awl diŋimurŋ agil aniŋipim akan? Nibop tay aginim? Nibi gitep gem nigen yip tep gup aginim akan? Aniŋipim anib ak, gitep gem nigen yip tep gup ma agebin.

Biawl Jisas bine okok kilop tap midup sek ñig wayn sek ñak

(Matyu 26.26-29, Mak 14.22-25, Luk 22.14-20)

²³ Takaw anib ak nibop agñinek ak, Biawl ak yip ñak ak nep aginek. Takaw anib ak aniŋil mideb. Jisas nop chen gi dad amnak ñin ak, sib gakniŋ, Biawl Jisas ne tap midup dil,

²⁴ God nop tep agil, tipagil agak, Mubwak yad ak ñen, nibop gek midtep giŋigabim agak. Nibi dil gos yip niŋilig niŋinimib agak.

²⁵ Pen tap ñibdil, ñig wayn kinag anib nep gil agak, Ñig wayn kinag anib ak, God nibop binib yad agil diŋigayn agak takaw koŋim ak tek mideb agak. Nikim yad ak ñen, takaw koŋim anib ak am wos giŋigab agak. Ak nim, ñin akal ñig wayn awl niŋigabim ak, yip gos niŋilig niŋinimib agak.

²⁶ Ak pen ñin akal tap midup ak sek ñig wayn ak sek pel niŋigabim ak, Biawl ak yul dil kumak

takaw ak agñinigabım tek ñiñinigabım. Anıgil ñibem mid dad amıl, Biawl adıkid ownıgab ñin ak.

Taydıl tek midobun agıl gos nigtep gıñıgun nım, tap midup sek ñıg wayn sek ñiñinigun

²⁷ Anıb ak, binıb Biawl tap midup sek ñıg wayn sek tap yokıp agıl ñibenıgel, kılı Biawl mubwak nıkım ne ak tap yokıp tek lek nıgel, God nıgek gach sek yenıgabal.

²⁸ Kılı keke ned taydıl tek midebin agıl gos nigtep gıñıgel nım, tap midup sek ñıg wayn sek ñiñinigel.

²⁹ Taynen? Binıb Biawl mubwak ne ak gos nigtep gıl tıg asık ma lıl, tap midup ñıbilıg ñıg wayn ñıbilıg anıgıpal okok, kılı ke yul dıñıg anıgel God kılöp gı timel gıñıgab.

³⁰ Adek anıb ak nep, binıb nıbop kuñay kiles ma gıl, tap gıl, ogınap pısnep kubal.

³¹ Çın pen ned taydıl tek midobun agıl gos nigtep gıñıgun. Gonıgabun, Biawl ak ne çınop gı timel gınım agıl ma nıgek, takaw ma dıñıgabun.

³² Biawl pen çın gıpun ak tıg asıkup ak, çınop yokıp mıñel ñılig timud wukup mel. Timud wukek nım gos nıgon, ne binıb lum awl okok kılöp yul awl ñıl gı timel gıñıgab ñin ak, çınop ayıp ma gıñıgab.

³³ Anıb ak tek, mam ay sıkop, Biawl tap ne ñiñinig apnan gıl, binıb ogınap tawsak lıl ma ñiñinımıb, kılöp kod midıl jimñıl ñiñinımıb.

³⁴ Nıbi olap yuwan gup tek, kal ne ke tap ñıbil ownımun. Mel ak apnan gıpım ak monmon gem, God nıbop gı timel gek takaw dıñıgabım. Pen

11:27 Nam 9.10, 9.13, Jon 6.51, 6.63-64, Hib 10.29
26.22, 2 Ko 13.5, Gal 6.4

11:31 Sng 33.5, 1 Jo 1.9

11:28 Mat

11:32 Sng

94.12-13, Hib 12.5-6, 12.11

takaw day oginap mideb ak, kidek midebim ak amil, agñi tep gil gilitep ginigayn.

12

God Kawnan ne ak kiles teplep keke ñub takaw ak

¹ Mam ay sikop, yad God Kawnan ne ak kiles keke ñub takaw ak, anib ak nibi nigtep ginimib agil gos niñid, nibop agtep ginigebin.

² Nib nepim, ned God nop kidek ma geligipim ñin ak, tap keke okok nibop gos lipigek, tap yepis takaw ma agep anib okok yil pel amil agnig yeligipim.

³ Anib ak nibop agtep gen nigtep ginimib. God Kawnan ne ak bi olap nop gos ñakniñ, ne Jisas pisnep apyap pakil kul gonimun agep tek ma lup. Pen God Kawnan ne ak bi olap nop gos ma ñek, Jisas ne Biawl mideb agep tek ma lup.

⁴ God Kawnan ne ak kiles teplep keke ñub ak pen, God Kawnan ne ak nokom yibil mideb.

⁵ Biawl ak wog ne keke yek tek giñibun ak pen, Biawl ak nokom yibil mideb.

⁶ God chinop midupsek gos keke kiles keke ñakniñ, wog ne keke gipun ak pen, God ne nokom yibil mideb.

⁷ Pen God Kawnan ne ak binib ne kilop keke kiles ñek misen lek, kili binib ne okok midupsek kilop ditep gil giñinigabal.

12:2 Sng 115.5-7, Hab 2.18-19, 1 Ko 6.11, Epe 2.11-12, 1 Pi 4.3

12:3 Mat 16.17, Mak 9.39, 2 Ko 3.5, 1 Jo 4.2-3 **12:4** Epe 4.4, Hib 2.4, 1 Pi 4.10 **12:4** Lom 12.6-8 **12:5** Lom 12.6-8, Epe 4.11 **12:7** 1 Ko 14.26, Epe 4.7, 1 Pi 4.10-11

8 God Kawnan ne ak binib olap kiles ñek, gos nigep takaw ak niñid agñub. Kawnan ne nokom ak, binib olap nop kiles ñek, takaw ak nigtep gil agñub.

9 Kawnan ne nokom ak binib olap nop kiles ñek, Klays nop kiles gil gos linigup. Kawnan ne nokom ak binib olap nop kiles ñek, binib tap gup okok gek kilop suñ lup.

10 Kawnan ne nokom ak binib olap nop kiles ñek, tap mageptek okok gup, binib olap nop kiles ñek, God gos ñeb takaw ak agñub, binib olap nop kiles ñek, God Kawnan ne wog ak akan, kicheki wog ak tig asikil nigtep gup. Pen Kawnan ne nokom ak binib olap nop kiles ñek, takaw yibil keke agup, binib olap nop kiles ñek, takaw yibil keke agel niñid, tig adikil agñub.

11 God Kawnan ne ak nokom yibil mideb ak, ne anib okok midupsek nep gup. Gos ne ke nigup tek, binib olap nop kiles teplep olap ñub, binib olap ke nop kiles teplep olap ke ñub.

Chin midupsek jimñil, Klays wak day ne tek ak keke midobun

12 Binib olap mubwak ne nokom mideb ak, day keke mideb. Pen day keke mideb anib okok midupsek, jimñil mubwak nokom olap mideb. Klays ne abe anib ak tek mideb.

13 Pen God Kawnan ne nokom ak chinop midupsek gek ñig pakinok. Chin Juda binib okok

12:8 1 Ko 13.2, 2 Ko 8.7 **12:9** Mat 17.19-20, 1 Ko 13.2, 2 Ko 4.13, Jem 5.14 **12:10** Apo 2.4, Lom 12.6, 1 Ko 14.5, 14.29, 1 Jo 4.1

12:11 Lom 12.4-8, 1 Ko 7.7, 2 Ko 10.13, Hib 2.4 **12:12** Lom 12.4-5, 1 Ko 10.17, Gal 3.16, Epe 4.4, 4.16 **12:13** Jon 6.63, Lom 6.5, Gal 3.28, Kol 3.11

ke, binib Juda mel okok ke midil, binib wog giñeb biawl olap muk okok midebal ke, binib wog gep biawl olap muk okok ma midebal okok ke midil, midupsek ñig pakñil miñil mubwak nokom tek midobun. Pen God chinop midupsek gek, God Kawnan ne ak ñig ñinjinok tek don, chinop nab ayañ am yek.

14 Chin nopun, mubwak ak day nokom ma mideb, day keke mideb.

15 Tob kid ak ne aginigab, Yad ñin kid ak ma midebin, anib ak tek mubwak day olap ma midebin, yad ke midebin agenigab, mel ak, tob kid ak mubwak day olap mideb.

16 Pen timud ak, Yad widin ak ma midebin, anib ak tek mubwak day olap ma midebin, yad ke midebin agenigab, mel ak, timud ak mubwak day olap mideb.

17 Mubwak ak widin okok midupsek midobikop ak, titay dil takaw agel timud pak nopikop? Mubwak ak timud okok midupsek midobikop, titay dil kuy pag nopikop?

18 Mubwak ak pen anigil ma mideb. God gos ne ke ninid, mubwak day nokom nokom dil mubwak midupsek gilup.

19 Pen mubwak ak day nokom yibil yobikop, titay dil mubwak yibil ak yobikop?

20 Mubwak ak pen anigil ma mideb. Mel yibil. Day kunay mideb ak pen, mubwak ak nokom mideb.

21 Pen widin ak aginigab, Ñin kid ak taynen yad ayip mideb, wog ne olap ma mideb agenigab, asik

ke nep midil midtep ma ginigab. Pen kimig won ak aginigab, Tob kid okok taynen yad ayip mideb, wog ne olap ma mideb agenigab, asik ke nep midil midtep ma ginigab.

²² Mubwak day oginap kiles ma mideb agil gos nopun ak, anib okok asik keke lup tek, mubwak ak midtep ginimuj tek ma linigab.

²³ Mubwak day oginap yokip mideb agil gos nopun ak, tib kadig nibun. Mubwak day oginap binib nigel, chinop neben gup agil gos nopun ak, sibnag walij yim yu gipun.

²⁴ Pen mubwak day okok niñid tep mideb agil gos nopun ak, keligil sibnag walij yim yu ma gipun. God pen, ne mubwak ak day okok midupsek gitep gil jimñil lek, mubwak nokom yibil mideb ak nim, day oginap yib ma mideb tek, God gek yib awl mideb.

²⁵ God ne mubwak day okok asik keke linigel tek lup ak agil anigek, adip adip tek midil nim, penpen chib nepal.

²⁶ Anib ak tek, day olap yul genigab, mubwak day okok midupsek ayip yul ginigabal. Pen day olap yib awl denigab, mubwak day okok midupsek ayip tep ginigab.

²⁷ Pen nibi Klays mubwak ne midebim, nokom nokom wak nin kid tob kid ne okok tek midebim.

²⁸ Pen God ne binib yad yil midupsek, kili keke wog ginigel agil, kilop anigil aglup. Oginap ned aglek, bi Jisas takaw nop dad ameb wog ak gipal. Oginap nab ak aglek, bi God gos ñek agñeb wog ak gipal. Oginap nab pen ak aglek, kili God binib

ne kilop takaw agñitep gep wog ak gıpal. God abe aglek, ogınap tap mageptek okok gıpal, ogınap binib tap gup okok gel kilop sun lup, ogınap binib kilop yımug niñid ditep gıpal, ogınap God binib ne okok kilop kod midil agel, wog ayıp gıtep gıpal, ogınap takaw yıbil keke apal.

²⁹ Tıtay dil? Midupsek bi Jisas takaw nop dad ameb wog ak gıpal akan? Midupsek bi God gos ñek agñeb wog ak gıpal akan? Midupsek kili God binib ne kilop takaw agñitep gep wog ak gıpal akan? Midupsek tap mageptek okok gıpal akan?

³⁰ Midupsek binib tap gup okok gel kilop sun lup akan? Midupsek takaw yıbil keke apal akan? Midupsek takaw yıbil keke agel niñid, tig adikil agñibal akan? Ak mel. Kili midupsek wog adek keke gıpal.

³¹ Pen God Kawnan ak kiles keke ñub ak, nibi kiles teplep yıbil ñub okok kiles gil dinigun agil gos niğinimib. Pen miñil tap gıtep gep adek ak nep nibop agñinigebin.

13

Penpen mapen lep ak, tap awl yıbil mideb

¹ Yad binib takaw yıbil keke apal tek ayıp, ensel takaw apal tek agenim ak pen, binib kilop mapen ma lenim, yad anib ak tek midebin. Akil yokip yokip nep pugıpal, mab pidim yokip yokip nep pakıpal tek midebin.

² Pen yad bi God gos ñek agñeb olap midil, God gos ne we gak ak midupsek niğtep gil, gos tipagil ke yıbil niñid, Klays nop gos linıñid, dum ogınap agen

ke okok amonimurj ak pen, binib kilop mapen ma lenim, tap yokip yibil tek midebin.

³ Tap yad midupsek mideb tek, bilok binib tap ma mideb okok kilop ñenim, pen yad niñid keligenim bi yip apil chichik dil, mab yinub nab ak diyokel kumnigayn* ak pen, binib kilop mapen ma lenim, tap genim anib okok yip gek midtep ginim tek ma linigab.

⁴ Bi ak binib kilop mapen lup ak, ne anigil gup. Binib okok kilop yilik ma niñid kabiyam ma juwil, mapen niñid ditep gup. Binib okok tap tep del, kilop milik ma nigup. Yad yib awl midebin agil gos ma niñid, yib ne ke dad ma aplanub.

⁵ Ne ke tap ak tap ak gilig suk awl ma gup. Tap ne okok nep gos ma nigup. Milik kasek ma nigup. Binib okok nop gi timel gel, gos anib ak nigilig ma mideb.

⁶ Binib tap timel gipal ak, nigeek nop tep ma gup ak pen, kili tap gitep gipal ak nigeek, nop tep gup.

⁷ Tap timel okok nop gek ma apyap pakup. Pel Klays nop gos lininid, midtep ginigayn agil gos sek kod midil, miñel titay apek, pel kiles gil jak mideb.

⁸ Binib kilop mapen lep anib ak, pel pelnep yenigab. Pen God binib gos ñek agñeb wog ak amek gijunigab. Kilop kiles ñek takaw yibil keke apal ak

13:3 Mat 6.2 * **13:3** Glik takaw mij nedil tikilak okok, takaw anib ak midupsek takaw nokom jimñil ma tikilak. Oginap takaw tikil anib agilak, Bi yip apil chichik dil, mab yinub nab ak diyokel kumnigayn agil tikak. Oginap pen tikil anib agilak, Bi yip apil chichik del, yad yib awl yibil dinigayn agil tikilak. **13:4** Snd 10.12, 1 Pi 4.8 **13:5** 1 Ko 10.24, Plp 2.4 **13:6** Sng 10.3, Lom 1.32, 12.9, 2 Jo 4 **13:7** Lom 15.1, 1 Ko 9.12, Gal 6.2, 2 Ti 2.24, 1 Pi 4.8

amek gijuniḡab. Kiloḡ kiles ñek gos niḡtep gep ak amek kul gijuniḡab.

⁹ Ak tek ak chin miñil gos sikol sikol nep niḡ midobun, God chinop gos ñek agñibun ak gos ne sikol sikol nep niḡ midobun.

¹⁰ Kidek pen, okok midupsek teplep yibil mideb ñin ak owniḡab ak, tap dayday mideb okok midupsek gijuniḡab.

¹¹ Yad ñisikol yeliḡipin ñin ak, yad ñisikol takaw ak aḡil, ñisikol gos ak niḡid, ñisikol tap titay dil mideb ak aḡil gos ak niḡid geliḡipin. Pen awl giḡ bi midebin ñin ak, ñisikol gos niḡid giḡal anib ak keliḡipin.

¹² Miñil God tap ne wiḡin nopun okok, niḡtep ma giḡ, ñiḡ kawnan pag nepal tek ak nopun ak pen, kidek God nop jomulik ak penpen niḡiniḡabun. Miñil God tap ne gos nopun okok, dayday tek nopun ak pen, kidek God chinop miñil niḡtep gup tek, nop niḡtep giḡiniḡabun.

¹³ Ak pen tap omiḡal nokom anib okok mideb. Klays nop gos liniḡep ak, God nop gos sek kod midep ak, binib okok kiloḡ mapen lep ak. Pen tap awl yibil ak nim, binib okok kiloḡ mapen lep ak.

14

God chinop gos ñek agñeb ak diniḡun aḡil, kiles giḡ aniniḡimib

¹ Nibi binib okok kiloḡ mapen liniḡimib, kiles timel giḡ aniniḡimib. Pen God Kawnan ak kiles keke ñub ak, abe kiles giḡ diniḡun aḡil gos niḡiniḡimib.

Kiles keke ñub ak ðinìgun gos nepim ak pen, God chinop gos ñek agñinìgun agil gos ak ned nìginìgabim ak, tep yibil anìginìgabim.

² Chin nopun, binib takaw yibil keke apal okok, binib oginap kilop takaw ma apal. God nop nokom apal. Takaw apal anib okok, binib oginap niñid takaw tay agebal agil, ma nepal. God Kawnan ne ak pen, kilop kiles ñek takaw we gep ak apal.

³ Binib pen God kilop gos ñek agñibal okok, binib oginap kilop takaw apal. Takaw anib ak agel nim, binib oginap niñid kiles gil jak tep gil midil, gos sek midil, gos kunjay ma niñid midtep gipal.

⁴ Bi God Kawnan ne ak nop kiles ñek takaw yibil keke agup ak, ne ke gos sek midil kiles gil jak tep gil mideb. Bi pen God nop gos ñek agñub ak, ne Klays binib ne pelpel apnan gipal okok kilop agtep gek, gos sek midil kiles gil jak tep gil midebal.

⁵ Nibi midupsek, God Kawnan ne ak nibop kiles ñek, takaw yibil keke aginimib agil gos nepin. Gos olap adek awl ak pen nepin, God nibop gos ñek agñinimib. Binib God Kawnan ne ak kilop kiles ñek takaw yibil keke agenigel okok, tig adikil agtep gil agñenigel, gitep gil Klays binib ne okok kili gos sek midil kiles gil jak tep gil yenigel. Binib pen takaw yibil keke apal ak tig adikil agñenigel tek ma lup okok, gitep ma gil wog kili sikol gipal. Pen binib God kilop gos ñek agñibal okok, kili gitep gil wog awl gipal.

⁶ Pen mam ay sikop, yad midebim ak amil, God Kawnan ne ak yip kiles ñek takaw yibil keke agenigayn, titay dil takaw anib ak nibop

gek midtep ginigabim? Yad nibop gen midtep ginimib agil gos nigenim, anigil aginim. God gos ne ak misen lil yip agek agnil akan, gos teplep yip owup tek agil akan, God yip gos ñek agnil akan, God takaw tep agyikil akan, anib agenim midtep ginigabim.

⁷ Nibi anib ak gos niginimib. Gawb gita tap okok binib kawnan tek ma midebal ak pen, tap anib okok gitep gil pakenigel binib kilop tep ginigab. Pen tap anib okok agtep ma gek, binib okok titay dil kimep olap niñid anib aginigabal, Kimep anib ak pakilig nigobun aginigabal?

⁸ Pen abe, akil ak pugel agtep ma gek, bi tikjakil penpen ginigun agil, tap dilitep gil kod ma yenigab.

⁹ Anib ak tek nim, nibi takaw yibil keke agenimib, binib kili titay dil takaw agebal ak agil, takaw nibi jij ak niginigabal? Nibi ke nep ag ag keliginigabim.

¹⁰ Lum awl ak, takaw yibil okok kunay yibil mideb, midupsek takaw jij ak midakniñ apal, yokip ma apal.

¹¹ Yad pen binib oginap takaw yibil olap aginigabal ak ma nigenigayn, kilop nigen, binib palawl okok nib tek linigab. Kili pen yip nigel, yad bi palawl okok nib tek linigab.

¹² Nibop anib ak tek nep ginigab ak, nigtep ginimib. God Kawnan ne ak kiles keke ñub ak dinigun agil pel gos nepim tek, kiles ne teplep yibil ñub ak dinigun agil kiles gil ginimib. Kiles ne anib okok dil, Klays binib ne okok kilop gem, gos sek midil kiles gil jak tep gil yenigel.

God Kawnan ne ak binib kilop kiles ñek takaw

yibil keke apal takaw ak

¹³ Anib ak bi olap God Kawnan ne ak nop kiles ñek takaw yibil keke olap agup ak, ne takaw yibil keke olap apin ak tig adikil agñinim agil, nop agniginimur.

¹⁴ Mel ak, yad takaw yibil keke olap agilig God nop apin won ak, gos yad ak yokip mideb. Nab yad ayan ke anib agan agek nep apin.

¹⁵ Anib ak tek yad titay dinigayn? Yad God nop aginig, nab yad ayan agek agil, gos yad ak abe niñid anib agil ginigayn. Kimep aginig, nab yad ayan agek agil, gos yad ak abe niñid anib agil ginigayn.

¹⁶ Nibi anigil ma genigabim, nab nibi ayan ke anib agan agek nep agilig, God nop tep agenigabim, binib yokip nab nibi yenigabal okok, takaw nibi aginigabim anib ak ma yibil niginigabal. Anib ak kili titay dil takaw nibi God nop tep agep ak niñid, niñid yibil apim aginigabal? Aginigel tek ma linigabal.

¹⁷ Nibi God nop tep agilig agtep gil yenigabim ak pen, kili takaw anib ak niñid, gos sek midil kiles gil jak tep ma yenigabal.

¹⁸ God Kawnan ne ak chinop kiles ñek takaw yibil keke apun ak, yip kiles ñek kunay yibil keke apin, nibop ñek sikol apim. Anib ak God nop tep apin.

¹⁹ Yad pen, Klays binib ne pelpel apnan gipal okok kili apnan gil yelakniñ, kilop agtep giñin agil, takaw sikol won olap agñen misen nig dinigabal gos nepin. Ak tep yibil. Takaw yibil keke kunay yibil okok aginigayn agil, gos ma niginigayn.

20 Mam ay sikop. Ñapay sikol gos nepal tek ma niginimib. Ñapay sikol tap timel ma gipal ak, nibi anib tek yenimib ak pen, binib awl gos nepal tek niginimib.

21 God takaw ak tikil anib agak, Biawl ak ne agup, Binib pal okok nib, takaw yibil kili ke olap apal okok, kilop agen, kili binib yad okok kilop aginigabal agup agil tikak. Aginigabal ak pen, binib yad okol takaw anib ak dinigun agil gos ma nep niginigabal agup agil tikak.

22 Anib ak tek, God Kawnan ne ak binib kilop kiles ñek takaw yibil keke apal ak, binib yip gos ma linepal okok niginigel agil gup. Binib yip gos linepal okok niginigel agil ma gup. God pen binib kilop gos ñek agñibal ak, binib yip gos linepal okok niginigel agil gup. Binib yip gos ma linepal okok niginigel agil ma gup.

23 Anib ak, nibi Klays binib ne pelpel apnan gipim okok apnan gil, midupsek kiles dil takaw yibil keke agenigabim, pen binib yokip oginap akan, binib Klays nop gos ma linepal oginap, kili migan ayan apil nibop niñid, tay aginigabal? Nibi binib sawl sek lup aginigabal.

24 Nibi pen God nibop midupsek gos ñek agñenigabim, binib Klays nop gos ma linepal oginap akan, binib yokip oginap, kili migan ayan apil nibop nigel, takaw nibi anib ak kilop gek, chin binib tap si tap timel gipun ak agil gos nigtep ginigabal.

14:20 Mat 18.3, Lom 16.19, Epe 4.14, Plp 3.15, Hib 5.12-14, 1 Pi 2.2

14:21 Ais 28.11-12, Jon 10.34 14:23 Apo 2.13 14:24 Jon 16.8

25 Pen tap timel we gil gos kili nab ayan yenigab ak, misen lil yenigab. Anigek, kili kigom yimil, jel kuyan gil jomulik ak di lum ayan lil, God yib nop dad aplanilig aginigabal, Niñid apun, God nibi ayip mideb aginigabal.

Klays binib ne pelpel apnan gipal won ak, anigil gitep ginigel

26 Anib ak mam ay sikop, apnan gipim nin ak, tay ginimib? Nibi midupsek wog midebim. Olap kimep agup, olap God takaw tep agyikup, olap God gos ne ak misen lil nop agek agñub, olap God Kawnan ne ak nop kiles ñek takaw yibil keke agup, olap takaw yibil keke apal anib okok niñid tig adikil agñub. Tap anib okok midupsek gipim ak, Klays binib ne okok kili niñid gos sek midil kiles gil jak tep gil yenigel agil nep ginimib.

27 Binib God Kawnan ne ak kilop kiles ñek takaw yibil keke aginig, ominal akan, ominal nokom nep aginigel. Kili jimnil ma aginigel. Mel. Olap ned agñek, olap kidek agñinimun. Pen olap takaw aginigel okok niñid, tig adikil agñinimun.

28 Pen takaw aginim agil, tig adikil agñinimun olap ma yonimun, takaw yibil keke aginige ak binib nab okok ma aginimun. Ne ke kimigel nab ayan agil, God nop agil yonimun.

29 Pen binib God gos ñek agñeb ominal akan, ominal nokom, kili agñinigel. Agñel, binib oginap takaw anib ak tig asik linigel.

³⁰ Pen binib oginap besig nig midebal okok, olap God ne nop gos ñonimun, bi ned tikjakil aginimun ak ne keligil, takaw ma agonimun.

³¹ Anigem, nibi midupsek nokom nokom God gos ñeb ak agñinimib tek lek, ag dad amil apil gil nim, Klays binib ne midupsek niñid, gos tipagil gos sek yenigel.

³² Pen binib God gos ñek agñeb okok, jonib kili ke kod midilig, takaw aginigel won ninokom kod midilig aginigel.

³³⁻³⁴ Chin nopun, God gek binib ne okok monmon ma gipal. Tap ne okok yipid gilitap gek, gos ne anib ak nigilig wog gel amek, kimigel midtep gipal.

Pen Klays binib ne God nop gos nigilig apnan gipal won ak, bin okok takaw ma agil, kimigel yenigel. Klays binib ne pelpel apnan gipal man keke okok midupsek, kili anib ak tek nep gipal. Bin okok bi kili muk okok yenigel. Takaw anib ak, takaw Mosis ñu kil tikak ak anib ak tek nep agup.

³⁵ Pen bin okok takaw oginap sek nigun agil nim, kal kili okok amil nigimil sikop kilop agniginigel. Nib nepim, bin Klays binib ne pelpel apnan gipal okok nab ak agenigab, tep ma gek nop ke neben ginigab.

³⁶ Titay dup? God takaw ne ak nibi yil owup akan? Takaw ne ak nibop nep owak akan? Mel yibil.

³⁷ Bi olap yad bi God gos ñek agñeb ak akan, bi God Kawnan ne ak yip kiles ñek wog gep ak agil gos nigup ak, ne gos nigtep ginimun. Takaw nibop

kil tikebin anib awl, Biawl takaw kiles ne agup ak niñid kil tikebin.

³⁸ Pen ne takaw anib awl ma nigeke, takaw aginimun ak ma niginimib.

³⁹ Anib ak mam ay sikop, God chinop gos ñek agñinigun agil, kiles gil gos niginimib. Pen binib God Kawnan ne ak kilop kiles ñek takaw yibil keke apal okok, kilop keligim ma aginimib.

⁴⁰ Nibi God nop gos nigilig apnan gipim won ak, monmon ma ginimib, yipid gil gilitep gilig gem amnimun.

15

Klays kumil tepayan tikjakak

¹ Pen mam ay sikop, takaw teplep nibop agñinek ak, nibop agñitep ginigebin. Takaw teplep anib ak nibi nig dil, kiles gil jak midebim.

² Takaw anib ak nibop agñinek ak, niñid di wos yibil genimib, God nibop tig asik deb. Pen mel ak, Klays nop gos linepim ak yokip yibil mideb, binib ne ma midebikep.

³ Takaw awl yibil yad niginek ak, nibop agñinek. Pen takaw anib ak anigil mideb. Chin tap si tap timel gipun tek, Klays chinop nen agil kumak, buk Baybol tikil ginigab agilak tek nep gak.

⁴ Kumek kamel, ñin omiñal nokom midil, tepayan tikjakak, buk Baybol tikil ginigab agilak tek nep gak.

14:39 1 Ko 12.31, 1 Te 5.20 **14:40** 1 Ko 14.33, Kol 2.5 **15:1** Lom 5.2, Gal 1.11 **15:2** Gal 3.4 **15:3** Sng 22.15, Ais 53.5-12, Dan 9.26, Sek 13.7, 1 Ko 11.2, 11.23, Gal 1.12 **15:4** Sng 16.8-10, Mat 12.40, Luk 24.26, 24.46, Apo 2.24-32, 13.33-35

⁵ Tikjakil misenj gek, Pita nop nigak. Nigek, kidek misenj gek, bi Jisas takaw nop dad ameb anep umigan okok nop nigilak.

⁶ Kidek pen tepayan misenj gek, bine anep 500 tek nop nigilak. Bine anib okok, oginap kumilak ak pen, kunay nep oginap midebal.

⁷ Kidek ñin olap misenj gek, Jemis nop nigak. Ñin olap pen, bi Jisas takaw nop dad ameb okok midupsek nop nigilak.

⁸ Pen bi anib okok nop nigilak ñin ak apil padikek, kidek misenj gek yad abe nop niginek. Ak tek ak yad ñapay tik tep ma gipal tek olap yenek yip kidek dak.

⁹ Bi Jisas takaw nop dad ameb nab okok, yad bi tam nib okok tek midebin. Yad God binib ne pelpel apnan gipal okok, kilop gi timel yibil geligipin. Anib ak bi Jisas takaw nop dad ameb olap yenim tek ma lup.

¹⁰ God pen yip yimug niñid gitep gek, bine midil, bi ak ke nib tek midebin. Pen God yip yimug niñid gitep gup ak, yokip midil kul ma gup. Bi Jisas takaw nop dad ameb okok wog gipal tek ma gipin, God yip yimug niñid gitep gek, wog awl yibil ak gipin.

¹¹ Anib ak takaw apun ak, yad agñibin akan bi Jisas takaw nop dad ameb oginap agñil nim, chin midupsek Jisas kumil tepayan tikjakak takaw telep ak agñibun. Agñon amek, nibi niñid Klays nop gos linepim.

15:5 Mat 28.16-17, Mak 16.14, Luk 24.34-36, Jon 20.19 **15:7** Luk 24.50, Apo 1.3-4 **15:8** Apo 9.3-6, 22.14, 22.18, 1 Ko 9.1 **15:9** Apo 8.3, 9.1, Gal 1.13, Epe 3.8, 1 Ti 1.13-15 **15:10** Apo 8.3, Lom 15.18-19, 2 Ko 3.5, 6.1, 11.5, 11.23, Plp 2.13

Klays binib ne pisnep kupal okok tepayan tikjakinigabal

12 Pen Klays kumil tepayan tikjakak agil takaw pel agñibun ak, nibi oginap titay dil apim, Binib okok kumil tepayan ma tikjakipal apim?

13 Binib kumil ma tikjakipilap ak, Klays ma tikjakipikop.

14 Pen Klays ma tikjakipikop ak, takaw agñibun ak takaw tek ma lek, Klays nop gos linepek ak, nop gos ma nepikep.

15 Klays ma tikjakipikop, chin God tap gak ak yepis yibil agil, bi yepis agep tek yobinop. Chin takaw misen agñibun, God gek Klays tikjakak agñibun. God pen gek binib kumil ma tikjakep tek lopikop, Klays nop gek ma tikjakipikop.

16 Niñid apun, binib kumil ma tikjakipilap ak, Klays ma tikjakipikop.

17 Pen Klays ma tikjakipikop, Klays nop gos linepim ak tap yokip, binib ne midebim tek ma yebikep. Binib tap si tap timel gil pisnep kupal tek ak yebikep.

18 Pen binib Klays nop chigil kumilak okok abe, am pisnep kul gipilap.

19 Chin Klays nop chigil nim, chinop ditep yibil ginigab agil gos sek kod midobun. Pen lum awl nep midon chinop ditep yibil gipikop, binib yimgeptek okok yobinop. Binib yimgeptek oginap midel, binib okok kilop niñid yimug nepilap ak pen, chin yimgeptek awl yibil midon, binib okok chinop niñid yimug awl yibil nepilap.

20 Pen anigil ma mideb, mel yibil. Klays kumek God gek tepayan tikjakak. Binib kubal okok, ne ned tikjakak, tap midup wog nab kideyil ned jakup tek. Anib ak tek, God gek binib kubal okok tepayan tikjakinigabal ak, nigtep gipun.

21 Nigim. Bi olap gek binib kumeb tek lup tek, bi olap abe gek binib kumil tikjakep tek lup.

22 Takaw agebin anib ak, binib Adam jij ne ak midebal okok, midupsek ne kumak tek kubal. Anib ak tek nep binib Klays jimnil chig tep gebal okok, kilop midupsek gek tikjakil kim yenigabal agil agebin.

23 Pen kili nokom nokom nin kili ak ke tikjakinigabal. Klays ne bi ned tikjakak ak. Pen kidek adikid ownigab nin ak, binib nop yil yenigabal okok gek, midupsek tikjakinigabal.

24 Tikjakel, kidek lum awl kul ginigab nin ak ownigab. Nin anib ak Klays ne kicheki binib okok kilop kod midebal okok sek, kicheki kiles midebal okok sek, kicheki lum awl kod midebal okok sek, kilop midupsek tig jisipuk gi diyokinigab. Aniginigab ak nim, ne binib tap titay kod yenigab okok midupsek, Bapi God nop agek kod yenigab.

25 Chin nopun, Klays ne binonim midil binib tap okok kod midil, mid dad amil, God ne Klays binib tap okok ayip penpen gep okok midupsek kilop tob muk ne okok lek, taw tibikinimun.

26 Pen tap timel anib okok midupsek tig jisipuk gi diyokil, kidek kumeb ak abe tig jisipuk gi

15:20 Apo 26.23, 1 Ko 15.23, Kol 1.18, 1 Pi 1.3, Lep 1.5 15:21
Jon 11.25, Lom 5.12, 5.17-18, 6.23 15:23 1 Te 4.15-17, Lep 20.5
15:25 Sng 110.1, Mat 22.44, Apo 2.34-35, Hib 1.13 15:26 2 Ti
1.10, Lep 20.14, 21.4

diyokinigab.

²⁷ Buk Baybol ak tikil agak, God binib tap okok midupsek kilop tob muk ne okok lek, taw tibikinimuj agil tikak. Pen God ne binib tap okok midupsek kilop Klays tob muk ne okok lup takaw agil tikak anib ak, chin ninid anigil nopun, God ne Klays nop tob muk okok yen agil ma tikak. God pen ne ke nokom tap anib okok midupsek Klays nop tob muk okok lup.

²⁸ Pen God ne binib tap okok midupsek kilop Klays tob muk okok linimuj nin ak, Klays God Nine nep mideb ak, ne yad God tob muk okok linim agil, aniginigab. God gek tap okok Klays muk okok midil, Klays ne am God muk okok midil aniginigab ak nim, God ne ke nokom binib tap okok midupsek adek yibil ak kod yenigab.

²⁹ Pen anib ak nigim. Binib oginap kili binib kubal okok kilop giniginigun agil, nig pakipal. Taynen anigipal? Anigenigabal, titay dil binib kubal okok kilop giniginigabal? Nibi oginap apim, Binib kubal okok ma tikjakinigabal apim. Ak nim, binib kumil tikjakinigel tek ma yibil lenigab, binib oginap taynen binib kubal okok kilop giniginigun agil, nig pakipal?

³⁰ Pen chin abe tay dinigun? Chin kumil tikjakep takaw ak pel aj agnon, bi oginap ninid, chinop pel gi timel ginig gipal. Binib pen kumil tikjakinigel tek ma lenigab, taynen anigipun?

³¹ Mam ay sikop, minek minek yip gi timel ginig gel, yad kumnim tek lup. Yad nib ayip Biawl chin

Klays Jisas midobun, anib ak tek nibi anigil midem nigen yip tep gek, takaw anib ak nibop misen apin.

³² Yad taun Epesus midil, bi oginap chen ladek tek yip gi timel yibil gil, ayip penpen ginok. Lum awl gos ak niñid tap oginap dinim agil aniginek akan? Mel yibil. Binib tepayan tikjakinigabal agil aniginek. Binib pen tepayan tikjakinigel tek ma lenigab, takaw olap apal, Tol pisnep kumnigabun, anib ak miñil midobun ñin awl, tap ñibilig ñig ñibilig gi yonigun apal ak, chin niñid kidek ginigun.

³³ Binib nibop yepis aginigel ak, ma yibil niginimib. Takaw anib ak nepim, Binib pel gitep gipal okok, kili binib pel gi timel gipal okok ayip jimñil midil, tap timel adek anib ak nep ginigabal.

³⁴ Gos ke niñid sawl lipim ak keligil, yipid gil yibil gos niginimib. Pen tap si tap timel gipim ak keligil, anib okok ma ginimib. Nigim, nibi oginap God nop gos ma nepim. Nibi nigem neben ginimib tek linigab agil, nibop takaw anib ak agebin.

Binib tepayan tikjakinigabal okok, wak ke yibil yenigabal

³⁵ Pen binib oginap agniñid aginigabal, Binib kubal okok taydil tek tikjakinigabal aginigabal? Mubwak kili ak tay tek yenigabal aginigabal?

³⁶ Nibi binib sawl sek yibil okok. Tap yin midup lum ayan yimnigabim ak, ned kumil kuyilig yapil, kidek nep jakinigab.

³⁷ Pen midup ak, wit midup akan midup olap ke, tap tay midup yimnigabim ak, jak awl gup tek

15:32 Sav 2.24, Ais 22.13, Luk 12.19-20, 2 Ko 1.8, 4.10-11 **15:34**
Apo 26.8, Lom 13.11, 1 Ko 6.5, Epe 5.14, 1 Te 4.5 **15:35** Jon 12.24,
1 Jo 3.2 **15:36** Jon 12.24

ma yimnigabim. Midup sikol okok nep yimem jakinigab.

³⁸ Pen God gos ne ke niñid, tap yin midup okok wak sek yipil sek ñub. Midup keke wak sek yipil sek kilil ak keke ñub.

³⁹ Binib, sab chag tap okok abe mubwak keke mideb. Binib okok mubwak ke lup, sab chag okok mubwak ke lup, yawl okok mubwak ke lup, kubsal okok mubwak ke lup.

⁴⁰ Tap adekab alan yil okok, kilop keke lup. Tap lum awl yil okok, kilop keke lup. Tap adekab alan yil tap telep anib okok nop ke lup. Tap lum awl yil tap telep anib okok nop ke lup.

⁴¹ Sub milek tep ak ke midil, takan milek tep ak ke midil, gap milek tep ak ke mideb. Pen gap okok abe, milek tep ak keke mideb.

⁴² Binib kumil tikjakipal nim, anib ak tek mideb. Kumel kaw dinigabal wak ak, timel gil pisnep kul gep ak pen, tepayan tikjakinigabal wak ak, pisnep kul gep tek ma yibil linigab.

⁴³ Kumel kaw dinigabal wak ak, timel gil yokip tek midep ak pen, tepayan tikjakinigabal wak ak, telep yibil yenigab. Kumel kaw dinigabal wak ak, kiles ma midep ak pen, tepayan tikjakinigabal wak ak, kiles timel yibil yenigab.

⁴⁴ Kumel kaw dinigabal wak ak, lum awl nib owup ak pen, tepayan tikjakinigabal wak ak, God Kawnan ne ak gek yenigab.

Wak lum awl nib owep ak mideb, anib ak tek chin nopun, God Kawnan ne ak gek wak ak abe yenigab.

45 Buk Baybol abe tikil anib agak, Bi ned nib Adam ak, God ne nop gek konim yek agil tikak. Pen Adam kidek ak,* ne ke kawnan ak nim, binib gek konim midil pelpel midebal.

46 Tap God Kawnan ne nib ak ned ma owup. Mel. Tap lum awl nib ak ned apil, tap God Kawnan ne nib ak kidek apil gup.

47 Bi Adam ned nib ak lum awl nib, God lum dil nop gilak. Bi Adam kideyil ak, ne God man ne alanj nib owak.

48 Binib lum awl yil ak, bi lum awl nib tek ak midebal. Pen binib God man ne alanj yil ak, bi God man ne alanj nib tek ak midebal.

49 Miñil midobun ak, bi lum awl nib yek tek midobun. Anib ak tek nep, kidek bi God man ne alanj nib mideb tek ak abe yonigabun.

50 Pen mam ay sikop, anib ak nibop agebin. Binib lum awl yil ak, kili God binib dil kilop kod yenigab nab ak, am migan ayan yenigel tek ma lup. Binib wak ak kumil kuyilig yowep ak abe, pel pelnep yonimunj tek ma lup.

51 Nigim. Yad takaw we gup olap aginigebin. Chin midupsek ma kumnigabun ak pen, kumnigabun ayip konim yonigabun ayip, midupsek wak ke kideyil yonigabun.

52 Nin anib ak, akil kidek ak pugilig, widin kasek jukil anjilil niginigab tek aniginigab. Akil ak pugek,

15:45 Stt 2.7, Jon 6.33, 6.39-40, 6.54, 6.63, 2 Ko 3.4-6, 3.17, Plp 3.21

* 15:45 Bi Adam kidek ak, nim Klays nep. 1 Kolin 15.21-22 ayip, Lom 5.14-19 ayip niginimin. 15:47 Stt 2.7, 3.19, Jon 3.13, 3.31

15:49 Lom 8.29, 2 Ko 3.18, Plp 3.21, 1 Jo 3.2 15:50 Mat 16.17, Jon 3.3-5, 1 Ko 6.13 15:51 Plp 3.21 15:51 1 Te 4.15-17 15:52 Sek 9.14, Mat 24.31, 1 Te 4.16

binib kumnigabun okok tepayan tikjakil, kul gep tek ma linigab. Tikjakilig, binib yonigabun okok ayip, midupsek wak ke kideyil yonigabun.

⁵³ Ak anigil mideb. Binib chech nedil tig asik ke sinjak lil, chech kideyil lipal tek, wak chin kuyig yowep ak tig asik ke sinjak lil, wak kul gep tek ma linigab ak linigun. Pen wak chin kumeb ak tig asik ke sinjak lil, wak pel pelnep yenigab ak linigun.

⁵⁴ Wak kuyig yowep ak tig asik ke sinjak lil, wak kul gep tek ma linigab ak linigabun. Pen wak kumeb ak tig asik ke sinjak lil, wak pel pelnep yenigab ak linigabun. Aniginigab nin ak, buk Baybol takaw tikil agilak tek ginigab. Takaw anib ak tikil agilak,

God ne kumeb ak taw jisipuk gi timel yibil gek, pisnep kul gup agil tikilak.

⁵⁵ Kumeb ak, kiles nad akal midil, binib okok kilop taw jisipuk gi timel yibil ginimin agil tikilak? Kumeb ak, kiles nad akal midil, binib okok kilop nage yul dil mid timel ginigabal agil tikilak?

⁵⁶ Kumeb ak, ne tap si tap timel gep kiles ak dil anigup. Pen tap si tap timel gep ak, ne takaw Mosis nu kil tikak kiles ak dup.

⁵⁷ God pen, ne Biawl chin Jisas Klays nop agek apil chinop gek, kiles ne ak dil kumeb ak taw jisipuk gobun. Anib ak ninid, God nop tep agobun.

⁵⁸ Anib ak tek mam ay mapen yad okok, jak midil kiles gil yenimib. Nib nepim, Biawl wog ne ak

pel gipim ak, yokip kul ginimuŋ tek ma lup. Anib ak minek minek Biawl wog ne ak kiles gil ginimib.

16

Mani dilitep gem, dad God binib ne oginap sek kilop ñinimib

¹ Pen God binib ne Jelusalem midebal okok, nibi kilop gos niŋid, mani di nan gil ñinigabim takaw ak aginigebin. Klays binib ne pelpel apnan gipal Galesiya plopens okok, kilop mani anigil dilitep ginimib agen gilak tek, nibi abe ginimib.

² Nibi nokom nokom midupsek, Sande ñin okok midupsek mani titay dipim ak niŋid, oginap di nan ginimib. Genimib, mid dad amil kuŋay yibil linigab nim, midebim ak amjakinigayn ñin ak, mani piyowil ma ñinigabim.

³ Pen amjakinigayn ñin ak, bi nibi ke nigem tep gek aglinimib okok, kilop mij kil tikinigayn okok ñil agyokinim. Agyoken, kili mani ñinigabim ak sek mij kil tikinigayn ak sek dad Jelusalem amnigabal.

⁴ Pen yip ameb tek lek, yad ayip amnigabun.

Pol Kolin binib kilop niginig amnigab

⁵ Pen Masedoniya plopens amnigebin tek, nab anib okok ajil, kidek am midebim ak ninigayn.

⁶ Nib ayip sikol won olap yenim tek lup akan, yad ma nepin. Akan yobup lil takil gup ñin ak nib ayip midil, man akal amnig, yip dam kanib nab ak yokem amnigayn.

7 Miñil nibop amil sikol won olap midil niñid ameb ak, yip tep ma gup. Biawl ak yaw agonimuj, yad kidek nib ayip tapin yenigayn.

8 Yad pen taun Epesus awl miden, Pedikos* ñin awl ak apil padikek amnigayn.

9 Taun Epesus anib awl, God ne kanib yip yikek, takaw tep ne ak agñilig wog ne ak kuñay mideb ak gen, binib kuñay Klays yil ownigel tek lup. Pen bi yip yilik nepal okok abe kuñay midebal.

10 Bi Timoti midebim ak apjakenigab, nop ditep gem, nib ayip midil ma pilikinimuj. Nigim. Ne yad Biawl anop wog gipin tek nep gup.

11 Anib ak nibi oginap nop bi yokip tek mideb ak agil ma keliginimib. Pen kidek amnig, nop gem midtep gakniñ, dap kanib nab ak yokem midebin awl ownimuj. Yad ne ayip mam oginap ayip adikid ownigel agil kod midebin.

12 Pen mam Apolos nop takaw ak anigil mideb. Yad nop nebneb gilug apin, Mam oginap Kolin amebal tek, ayip amnimin apin ak pen, ne miñil ma yibil amnigayn agil gos nigup. Kidek pen ameb tek lek amnigab.

Takaw day won oginap

13 Nigtep gil yenimib. Klays nop kiles gil gos linigilig yenimib. Kiles timel yibil midil, tap olap ma yibil pilikinimib.

14 Tap okok midupsek ginigabim ak, mapen lep

16:7 Apo 18.21 **16:8** Wkp 23.15-21, Lo 16.9-11 * **16:8** Pedikos ñin awl ak, Aposel sapta 2 lain 1 takaw agñeb ak nigimimin. **16:8** Apo 19.8-10 **16:9** Apo 14.27, 19.8-10, 2 Ko 2.12, Kol 4.3, Lep 3.8

16:10 1 Ko 4.17 **16:12** 1 Ko 1.12, 3.6 **16:13** Sng 31.24, 1 Ko 15.1, Epe 6.10, Plp 1.27, Kol 1.11, 1 Te 5.6 **16:14** 1 Ko 14.1, 1 Pi 4.8

adek ak gem amnimun.

15 Mam ay sikop. Nib nepim, binib Akaya plopens nib ak Klays nop dilak okok, Stepanas ayip binib ne ayip kili Klays nop ned dilak. Dil nim, kili ke binib God yil okok kilop giñinigun agil, ditep gilig nep midebal. Anigel, nibop kiles gil agniñid agebin,

16 binib tep anib okok tek niñid, aginigel tek nep kidek ginimib. Pen binib wog anib ak tek gil, wog ayip kiles gipal okok, kilop abe niñid, aginigel tek nep kidek ginimib.

17 Pen nibi apil yip niginimib tek ma lek, Stepanas ayip, Potunatus ayip, Akaykus ayip apil yip nepal anib ak, yip tep gup.

18 Anigel, yad gos sek kimigel midtep gipin, nibi abe gos sek kimigel midtep gipim. Anib ak bi anib okok tek, bi tep yibil midebal agil, takaw aginigel ak niginimib.

19 Klays binib ne Esiya plopens midebal okok, kili nibop ag dideg lebal. Akwila bin ne Plisila sek, Klays binib ne kal ñili pelpel apnan gipal okok sek, kili nib ayip Klays Jisas yil midobun agil, nibop ag dideg lebal.

20 Mam ay midebal awl midupsek, kili nibop ag dideg lebal. Chin God binib ne pel gipun tek, nibi miñmiñ gilig penpen ñin pak sakinimib.

21 Yad Pol, takaw day won awl ñin midup yad ke tikil, nibop ag dideg lebin.

16:15 Lom 16.5, 1 Ko 1.16 **16:16** 1 Te 5.12 **16:18** Plp 2.29

16:19 Apo 18.2, 18.18, 18.26, Lom 16.5, 2 Ti 1.15 **16:20** Lom 16.16, 2 Ko 13.12 **16:21** Kol 4.18, 2 Te 3.17

²² Binib an Biawl ak nop mapen ma lil nim, mab ke yineb ayan pisnep amnimuŋ. Biawl ak, nad ownimin.

²³ Biawl Jisas ne nibop yimug niŋid gitep ginimuŋ.

²⁴ Yad nib ayip Klays Jisas yil midon, nibop midupsek mapen lipin.

Jisas Klays Takaw Teplep Ne Tay New Testament

copyright © 2013 Pioneer Bible Translators

Language: Tay (Tai)

Translation by: Pioneer Bible Translators

This translation is made available to you under the terms of the Creative Commons Attribution-No Derivatives license 4.0.

You may share and redistribute this Bible translation or extracts from it in any format, provided that:

- You include the above copyright and source information.

- You do not make any derivative works that change any of the actual words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2022-06-21

PDF generated using Haiola and XeLaTeX on 18 Mar 2025 from source files dated 29 Jan 2022

24d09cce-9a93-523a-afa5-7b091c264cee